

Йохана бичсн Сэн Зэнг

Нүр үг

Йохан Исусиг Бурхна мөнк Үг гиж Сэн Зэнгдэн үзүлжэнэ. Тер Үг күн болж, мадн дунд бүүрлж (1.14). Исус Бурхнас илгэгдсн Авраач, Бурхна Көвүн гиж иткүлхин төлө, болв иткэд, Терүнэ нернэ төлөд мөнк жирһл эдлтхэ гийһэд эн дегтр бичүлгдсн бээж (20.31). Исус Бурхна мөнк Үгнь гиж нүр үгд бичэтэ. Терүнэ дару Сэн Зэнгин негдгч энгд зүсн-зүүл өвөрц йовдлмуд Исусиг урдаснь Авраач, Бурхна Көвүн гиж үзүлж. Цааранднь өвөрц йовдлмуд ю цөөлжэхинь медүлжэнэ. Дегтрин эн энгднь зэрм улс Исуст яһж итксиг, Терүг дахж йовх улс болсна тускар бичэтэ. Болв зэрмнь Терүнэ өмнэс буцад итклэн хайсна тускар бас бичгдж. 13-17 бөлгүд Исус Эврәннь сурһульчнртаһан чирэһэрн харһад күүндсиг, Терүг кирст телүлөд хадхин өмн сө келсн үгмүд сурһульчнриг яһж белдсиг, теднд урмд өгсиг үзүлжэнэ. Сүүлнк бөлгүдт Исусиг бэрснэ, Терүнэ зарһин, Терүнэ телүлөд хадгдсна болн эмдрснэ тускар, энүнэ хөөн сурһульчнртан баралж үзгдснэ тускар бичэтэ. Хууль гүүһэд килнц һарһсн күүкд күүнэ туск тууж дөрвлжн хавсрт орулж бичж (8.1-11). Яһад гихлэ, кесг түрүн зун жилмүдин бичгүдт болн орчулсн бичврт терүг орулсн уга, болв зэрмснь терүг талдан ормд орулцхаж. Йохана бичсн Сэн Зэнг Христосар дамжад өггджэх мөнк жирһлин белг йилһэн үзүлгдж. Эн белг ода өггджэнэ. Исус — йовх хаалһ, үнн болн жирһл болжана гиж эн белг иткжэх улст нерэдгдж. Сэн Зэнгдэн Йохан шажна бээдл үзүлхэр өдгэ жирһлэс йирин юмсуд авч кергленэ. Үлгүрнь: усн, өдмг, герл, хөөч болн хөд, уста үзмин иш, терүнэ темснь. Тернь седклин тоолвр болна.

Учр-утхин зура

Орулгч үг 1.1-18

Уснд кирслдг Йохан болн Исусин түрүн сурһульчнр 1.19-51 Исусин

цэрглт 2.1-12.50

Сүүлцкөдрмүд 13.1-19.42

Деед Эзнэ эмдрллһн болн залрж ирлһн 20.1-31

Товчлгчднь: Һалильяд болсн бусд үзүллһн 21.1-25

Үг кун болж

1:1 Орчлң үүдхэс урд Үг бээж. Үг Бурхнла негн бээж. Үг Бурхн бээж. 2 Орчлң үүдхэс урд Үг Бурхнла бээж. 3 Цутнь Үгэр дамжж үүдэгдж. Терүг угаһар юмн үүдсмн ута бээж. 4 Цут үүдэсн юмн Үглэ ниилэд жирһж. Жирһл күмни герл бээж. 5 Герл харһуд гилвкнэ. Харһу терүг диилсн уга. 6 Бурхн кү илгэж, күүнэ нернь Йохан бээж. 7 Цуһар соңсад итктхэ гихэд Йохан герлин туск герч болад ирж. 8 Бийнь герл биш бээж. Герлин туск герч болад орчлнд ирж. 9 Үг гисн йосн герл мөн. Герл орчлнд ирэд күмн-эмтнд тусж герлтүлнэ. 10 Үг орчлнд бээж. Терүгэр дамжж үүдсн орчлң Бийнь таньсн ута 11 Эврэ һазрур ирж. Эврэ эмтн терүг седклдэн орулсн ута. 12 Седклдэн орулсн эмтнд, Бийднь итксн эмтнд Бурхна үрдүд болх зөв Тер өгв. 13 Эн үрдүд экиннь геснэс, күүкд күн залу күн хойрин седвэрэс төрсн үрдүд биш, эдн Бурхнас төрсн үрдүд. 14 Үг күн болж, мадн дунд бүүрлж. Эн Үг маднд чилшго хээрлтиг, Бурхна туск үнниг үзүлв. Эцкиннь һанцхн көвүн болж Эцкэс авсн Терүнэ йосиг бидн лавта үзвидн. 15 Йохан Терүнэ тускар чаң дууһар иигж герчлж: Эн күүнэ тускар би иигж келләв: Мини хөөн ирхнь нанас ик чинр-тэ, юңгад гихлэ Тер нанас урд мөнкиндэн бээдг бээж. 16 Тер эврәннь ик байлг хээрлтэс маднд дам-дам сэ кеһэд эдслв. 17 Бурхн Мошеһар дамжад зака өглэ, зуг хээрлт болн үн Исус Христосар дамжж үзүллэ. 18 Бурхиг күн төрүц үзэд ута, зуг Эцкиннь өөр бээсн ор һанцхн Бурхн маднд Бурхна тускар медүлв.

Уснд кирслдг Йохана герчллһн

19 Ерусалимд бээдг евреймүдин ахлачнр Йоханур гелңгүдиг болн Левихниг илгэв. Тедн ирэд: — Чи кембч? — гиж Йоханас сурв. 20

— Би Христос бишв, — гиж тер дарунь Йохан илэр келв. 21 — Тиигхлэ кен гидг күмбч? Чи Элья болвзач? — гиж тедн сурцхав. — Уга, — гиж тер хэрү өгв. — Чи Мошен келсн ээлдэч болвзач? — Уга — гисн хэрү тенд соңсцхав. 22 — Чи кембч? Маднд келич. Бидн мадниг илгэсн улст хэрүһинь келж өгх йоставидн. Бийиннь тускар ю келнэч? — гиж тедн сурцхав. 23 Йохан теднд ээлдэч Эшьян үгэр келж өгв: «Би эжго көдэд хээкржэх дунв: Деед Эзнэ хаалһинь һо кетн». 24 Тер эмтиг пар-шмуд илгэсн бээж. 25 — Кемр чи Христос биш, Элья биш, Мошен келсн ээлдэч биш болхла, юңгад чи эмтиг уснд кирслнэч? — гиж тедн сурцхав. 26 — Би эмтиг уснд кирслнэв. Зуг тадн дунд таднд таньгддго күн бээнэ. 27 Тер мини хөөн ирх. Би болхла Терүнэ башмгиннь бүчинь тээлх зөв утав, — гиж Йохан хэрүднь келв. 28 Цут эн йовдл Бетэнья өөр, Йордан холын дорд үзгин көвэд, Йохан эмтиг уснд кирслсн һазрт, учрв. 29 Маңдуртнь Йохан өөрдж йовх Исусиг үзэд: — Хэлэтн, Эн эмтнэ килнц ута кедг Бурхна хурһн. 30 Энүнэ тускар би келлэв: Мини хөөн ирснь нанас ик чинртэ, юңгад гихлэ, Тер нанас урд мөнкиндэн бээдг бээж. 31 Би чигн Исусиг кенинь медсн уга билэв, зуг би Энүг цут Израиль орн-нутг медтхэ гийэд, эмтиг уснд кирслхэр ирв, — гиж келв. 32 Йохан эврәннь үгэн батлад келв: — Эрүн Сәкүсн ик деер Тенгрэс көглжрһн мет бууһад, Терүнэ деер үлдснь би үзв. 33 Би Терүг меддго билэв. Зуг уснд кирслхэр намаг Илгэснь нанд: «Эрүн Сәкүсн нег күн деер бууһад үлдх. Тер күн эмтнд Эрүн Сәкүс өгх», — гиж келлэ. 34 Би цуг энүг үзв, тегэд чигн герчлжәнэв, Эн — Бурхна Кевүн! — гив.

Исусин турун сурһульчнр

35 Дарук едртнь Йохан хойр сурһульчта хамдан бээсмн. 36 Аашсн Исусиг үзэд, тер: — Эн — Бурхна Хурһн! — гив. 37 Йохана хойр сурһульч тер үгмүдинь соңсад, Исусиг дахад йовв. 38 Исус эргэд ардан хэләһэд, тедниг дахж йовсинь үзв. — Таднд юн кергтэ? — гиж Тер сурв. — Рави, [хальмгаһар багш] Тана гер альдв? Келтн, —

гиж тедн сурв. 39 — Намаг дахад йовтн, эврэн үзхит, — гиж Исус келв. Цут эн дөрвн часла болв. Тедн йовад, Исусин герт ирэд, асхн ора күртл бээв. 40 Исусин тускар келсн үг соңссн сурһульчнрин негнь Шимон Пётрин дунь Андрей бээж. 41 Тер эврәннь Шимон гидг ахан олж авад келв: — Бидн Бурхна илгэсн Аврачиг — Христосиг олж аввидн! 42 Дэкэд тер ахан Исусур дахулж авч ирв. Исус Шимон тал хэлэжәһэд келв: — Йохана көвүн Шимон эндр өдрэс авн Би чамд Кеп гидг нер өгчәнэв.

Исус Пилипиг болн Натаналиг дууджана

43 Маңһдуртнь Исус һалилья тал йовхар шиидв. Тер Пилипиг олж авад: — Намаг дахад йов! — гив. 44 Пилип Бетсэд гидг хотна көвүн бээсмн. Тер хотн Андрейин болн Пётрин бас төрскн хотн бээж. 45 Пилип Натаналиг олж авад терүнд: — Бидн закана дегтрт Моше болн ээлдэчнр бичсн кү олж аввидн. Тер Назарет хотна Йосипин көвүн Исус бээж, — гиж келв. 46 — Назаретас сән юмн ирдви? — гиж Натаналь хэрүднь келв. — Эврэн йовад хэлэ, — гиж терүнд Пилип келв. 47 Исус аашсн Натаналиг үзэд: — Эн йосн Израилин күн. Энүнэ седклд мек худл төрүц ута, — гиж келв. 48 — Та намаг альдас меднэт? — гиж Натаналь өврж сурв. — Чамаг дуудхас урд Би чамаг инжр модна сүүдрт суусичнь үзлэв, — гиж Исус хэрү өгв. 49 — Багш, Та Бурхна Көвүнт. Та Израилин Хант! — гиж Натаналь келв. 50 — Би чамаг инжр модна сүүдрт үзв гиснд чи нанд иткжәнэч. Зуг чи энүнэс ик евэрц юм үзхич, — гиж Исус хэрү өгв. 51 — Би таднд үнэр келжәнэв, тадн заагрсн тенгрэс Күмни Көвүнүр бууж ирсн болн терүнэс деер өрггдсн Бурхна элчнриг үзхит, — гиж Исус немж келв.

Канад болсн хурм

2:1 Хойр өдрин хөөн һалильяд бээсн Кана гидг балһснд хүрм болж. Исусин экнь тенд бас бээж. 2 Исусиг сурһульчнрта хамднь бас тер хүрмд дуудж. 3 Гиичнр чаһран ууһад чилэхләнэ, Исусин экнь

Төрүнд келв: — Чаһр дэжж уга. 4 Исус эхдэн: — Аак, юнгад Та нанд энүнэ тускар келжэнэт? Мини цаг ирэд уга, — гиж хэрү өгв. 5 Исусин экнь зарцнрт: — Энүнэ келсинь кетн, — гив. 6 Тенд зурһан ик чолун буһш зогсжала. Еврей келн эмтн эврәннь йосар юм эрүслж уһахин төлө терүг бэрдг бээсмн. Буһш болһнднь 80-120 литр ус багтдг бээж. 7 — Сав болһниг дүүргэд ус кетн, — гиж Исус зарцнрт келв. Тедн буһшмуд дүүргэд ус кев. 8 Исус: — Ода эн савас ус утхж авад, хүрмин ахлад авч одад егтн, — гив. Зарцнр келсинь күцэв. 9 Хүрмин ахлад чаһрт хүврсн усиг амсв, тер чаһриг альдас авсинь медсн уга бээж, зуг һанцхн зарцнр медлэ. Хүрмин ахлад күргиг дуудж авад келв: 10 — Эмтн сэн һара чаһриг нэр эхлхләнһ хүрмин гиичнрт өгнэ. Цуһар согтж одхла, му чаһр һарһж өгнэ. Чи болхла сэн чаһриг ода күртл бэрэд суусмч? 11 Эн Исусин үзүлсн эвэрц йовдлмудын түрүңкнь бээсмн. Цуг эн йовдл һалильяд бээсн Кана гидг балһснд учрсмн. Иигэд Исус эврәннь күчтэ нерән туурулв, энүнэ хөөн сурһульчнр Төрүнд икэр иткв. 12 Цааранднь Исус сурһульчнртаһан Капернам хот темцж йовв. Исусин экнь, дүүнрнь Төрүнлэ хамдан бас һарад йовцхав. Капернамд тедн цөөкн өдр бээв.

һол сүмиг цеврлһн

13 Евреймүдин Песах гидг нэр өөрдж йовсмн, тегэд Исус Ерусалим балһснур һарад йовв. 14 Исус Ерусалимин сүм дотр бухмуд, хөд, көглжрһс хулдсн эмтиг үзв. Мөңг сольдг эмтиг чигн Тер үзв. Тедн ширән өөр сууцхаж. 15 Тиигхлэ Исус деесэр маля гүрэд, хөөдиг, бухмудыг көөһэд һарһв. Мөңг сольдг эмтнэ ширәһинь хольврулад, теднэ мөңгинь тараһад хайв. 16 — Эднән авад цааран эрлтн! Мини Эцкин гериг хулд гүүлгәнэ герт бичэ хүврүлтн! — гиж Исус көглжрһ хулджасн эмтнд келв. 17 Энүг үзсн сурһульчнр, Бурхна Бичгт бээсн «Би тана герт дуртав. Тер дурн дотрим шатажана» гисн үгмүдиг тодлж санв. 18 — Иигж кех йосн чамд бээхиг медүлхин кергт онц темдг үзүл, — гиж евреймүдин толһачнр Исусин өмнэс келцхэв. 19 — Эн сүмиг хамхлад таратн, Би һурвн хонгин болзгт

цут энүг хэрү тосххв, — гиж Исус хэрүднь келв. 20 — Кезэнэ эн сүмиг дөчн зурһан жилдэн эмтн тосхсмн. Чи болхла Энүг һурвн өдрин туршт босхахар седжэхмч? — гиж евреймүдин толһачнр хэрүцв. 21 Исус болхла сүмин тускар келсн цагт Эврәннь цогцин тускар келсмн. 22 Хөөннь Исус амдрснэ хөөн Терүнэ сурһульчнр Исусин цут эн үгиг тодлж санла. Тедн Бичгт болн Исусин келснд иткв.

Исус цуг эмтнэ уха-седклинь меднд

23 Исус Ерусалимд Песахин нээрт бээсн цагтан өвэрц йовдлмуд үзүлв. Тер учрар кесг эмтн Терүнд иткв. 24 Зуг Исус теднд икэр нээлсмн ута, юңгад гихлэ, Исус амтиг сээнэр меддг бээж. 25 Исус эмтнэ дотрк уха-седклиг сээнэр меддг бээсмн. Тер учрар Исуст күүнэ тускар юм келх керг ута билэ.

Исус болн Никодим хойр

3:1 Паршмуд заагт нег күн бээж. Терүнэ нерн Никодим. Тер евреймүдин толһачнрин негнь бээж. 2 Нег дэкж Никодим сөөһөр Исусур ирэд келв: — Багш, Тана кесн өвэрциг нег чигн күн Бурхн утаһар кеж чадшго билэ. Тер учрар Таниг Бурхна илгэсн Багш болдгинь бидн меднэвидн. 3 — Күн болһн шинэс эс төрхлэ, Бурхна ориг үзж чадшго гиж Би чамд үнэр келжэнэв, — гиж Исус хэрү өгв. 4 — Көгшн күн шинэс яһж төрхмб? Тер хойрдад эврәннь экин геснд орад төрж һаршгоlm? — гиж Никодим Исуст келв. 5 — Һанцхн уснас төрснь, Сәкүснэс төрснь, Бурхна орнд тусж чаджана гиж үнэр келжэнэв. 6 Цогц бийэс төрснь, цогц бий болна. һанцхн Сәкүснэс сәкүсн төрдг мөн. 7 Шинэс төрх кергтэ гисндм бичэ өврэд бэ. 8 Салькн дурта һазртан шуугад көдлнэ. Чи терүнэ шууга соңснач, зуг альдас һарад, альдаран темцж үлэжэхинь медх арһ чамд уга. Сәкүснэс төрсн күн лавта тиим болна, — гиж Исус келв. 9 — Тиим юмн яһж болхмб? — гиж Никодим сурв. 10 — Чи Израиль эмтнэ багш болнач, зуг цут энүг эс медашлмч? 11 Үнэр келжэнэв, Бидн

медсэн келнэвидн. Бидн үзсэн герчлнэвидн, зуг тадн Мана герчлнгиг үнн гиж ухандан авхшит. 12 Кемр орчлнгин юмна тускар келхлэ, тадн нанд эс иткхлэ, теңгрин юмна тускар келсн цагт яһж нанд иткхмт? 13 Теңгрэс бууж ирсн Күмни Көвүнэс тадцан күн Теңгрт бөөһэд уга. 14 Моше көдэд күрл моһаг модн деер өргсн кевэр Күмни Көвүн өрггдх зөвтэ. 15 Тегэд Нанд иткдг күн мөнк жирһл эдлх. 16 Юнгад гихлэ, Бурхн орчлнд дегд хээртэ болад, Исуст иткдг күн үкл уга, мөнк жирһл эдлтхэ гиж ор ханцхн Көвүһэн өгсн мөн. 17 Көвүһэрн орчлнгин зарһ кех биш Көвүһэрн орчлнгиг харсж аврхин төлэ Бурхн Терүг һазрур илгэсмн. 18 Терүнд иткдг күн зарһла харһжахш, эс иткдг күн зарһла харһж. Яһад гихлэ, тер Бурхна ор ханцхн Көвүнд итксн уга. 19 Зарһнь иим: орчлнд герл тусж ирв. Зуг эмтн герлиг һолад, харһуг таасж авсмн. Юнгад гихлэ, теднэ керг-үүльнь хар. 20 Хар үүл күцэдг күн герлд дурго, үүльнь герлд илдкх гихэд, тер герлэс зулна. 21 Зуг үнн чикэр бээснь герлүр ирнэ. Бурхиг соңсад, цаһан үүлинь күцэсинь герл үзүлх гихэд тер тиигнэ, — гиж Исус келв.

Исус уснд кирслдг Йохан хойр

22 Энүнэ хөөн Исус эврәннь сурһульчнрла Йудья һазрур йовв. Тенд бээжәһэд, Исус эмтиг уснд кирслдг бээсмн. 23 Йохан тер цагт Шалим балһсна өөр Анон гидг һазрт бас эмтиг уснд кирслв. Юнгад гихлэ, тер һазрт дала усн бээж. Эмтн Йоханар бийән уснд кирслүлхэр ирдг бээсмн. 24 Йоханыг түүрмд суулһхин өмн цут эн учрсн бээж. 25 Йохана сурһульчнрин болн евреймүдин хоорнд усар әрүслһнэ хуучн авьясын тускар зүтклдән болв. 26 Тедн Йоханур ирэд: — Багш, урднь Йордана һолын телтр көвөд танта нег күн бөөлэ. Та Терүнэ тускар эмтнд келсн билэт. Ода тер эврән эмтиг уснд кирслнэ. Цугтан Терүн тал ирнэ, — гиж келцхэв. 27 — Күн теңгр заяж келсәр кергән күцәж чаджана, — гиж Йохан хәрү өгв. 28 — Би Бурхна илгэсн Аврач бишв, зуг би Терүнэ өмн йовхин төлэ илгэгдлэв, — гиж Мини келсн үгмүдин герчнр тадн эврән боллат.

29 Хэрд харчасн күүктэ көвүн күргн болна. Күргнэ үр күргиг соңсад зогсна. Терүнэ ду соңсад, үрнь байрлна. Тиигж би ик байрта бээнэв. 30 Терүнэ чинрнь өсж өрггдх зөвтэ, мини цаг болхла чилж йовна, — гиж Йохан келв.

Тенгрэс бууж ирснь

31 Тенгрэс бууж ирснь һазр деерк эмтнэс деер. һазрин үрн болхла һазрин үлмэд бээнэ, һазрин тускар келнэ. Зуг Тенгрэс бууж ирснь һазрин эмтнэс деер! 32 Тер Эврәннь үзсэн, соңссан герчлнэ. Зуг эмтн Терүнэ келснд иткхш. 33 Терүнэ герчлһ седклдэн авсн эмтн энүгэрн Бурхн — йосн үнн гиж лавта үзүлнэ. 34 Бурхна илгэсн күн Бурхна үгмүдэр келнэ. Юнгад гихлэ, Бурхн Терүг Сәкүсәрн дүүргнэ. 35 Эцк Көвүндэн дегд хээртэ болад, цутинь һартнь бэрүлв. 36 Көвүнднь иткдг күн мөңк жирһл эдлнэ. Көвүнэ үгинь эс соңсснь мөнк жирһл үзшго. Бурхна цааж терүнэ толһа деер буув.

Исус болн Самарья куукд кун

4:1-2 Йоханур ирдг сурһульчһрас тооһарн даву ик сурһульчһр Исусур ирэд, уснд кирслгджәнэ гидг зэңг паршмуд медчкв. (Үнэртнь болхла, Исус эврэн эмтиг уснд кирслдго бээж, Терүнэ сурһульчһр эмтиг уснд кирслдг бээж.) 3 Исус энүнэ тускар соңсад, Йудья һазриг үлдәһэд, хэрү һалилья тал йовсмн. 4 һалилья тал йовж йовад, Исус зууран Самарья һазриг дэврж һарла. 5 Тегэд Исус Самарья һазрт бээсн Сухар гидг хотнур орж ирв. Кезәнэ Яков Йосип гидг көвүндэн нег һазр өгсн бээж. Тер һазрин өөр Сухар гидг хотн бээж. 6 Тенд Яковин нертэ худг бээж. Исус хаалһдан муурад, тер худгин өөр ирэд сууһад амрв. Үдин цаг өөрдж йовла. 7 Нег Самарья күүкд күн тер худгур ус авхар ирж. — Нанд уух ус өгич, — гиж Исус сурв. 8 Сурһульчһр болхла тер цагт хот хулдж авхар, өөрк хотнур йовж одсн бээж. 9 — Та, еврей күн, нанас Самарья күүкд күүнэс уух ус сурдмт? — гиж Самарья күүкд күн Исусас сурв. (Тер юнгад гихлэ, евреймүд Самарья эмтнлэ төрүц дуһардго,

хэрлцдго бээсмн.) 10 — Кемр Бурхн эмтнд ю белглжэхинь, Кен чамас уух ус суржахинь чи медсн болхла, эврэн Нанас ус сурх билэч, болв Би чамд эмд ус өгх билэв, — гиж Исус хэрү өгв. 11 — Ах Нойн минь, Та суулh угат, худгтн болхла гүн. Эмд ус яhж авч чадхмт? 12 Та мана өвк эцк Яковас деер болвзгот? Тертн маднд эн худг өгсн билэ, болв бийнь эврэннь үрн-садтаһан, малтаһан энүнэс ус уудг бээсмн! — гиж күүкд күн хэрүднь келв. 13 — Кен чигн эн уснас уухла, дэкэд ундасх. 14 Зуг Мини өгсн уснас ууснь төрүц ундасшго. Юңгад гихлэ, Мини өгсн усн күүнэ дотр мөңк жирһл өгдг булгт хүврх, — гиж Исус үгинь соңсчкад келв. 15 Тиигхлэ күүкд күн келв: — Ах Нойн минь, намаг хөөннь ундасдгоһар, эн худгур дэкж ирдгоһар тер уснасн өгит, — гив. 16 — Гер талан йовад, эврэннь залуһан нааран дахулж авч ир, — гиж Исус хэрүднь келв. 17 — Би залу угав, — гиж күүкд күн хэрүцв. — Чи үнэр келвч. Чи залу угач. 18 Чи тавн залута билэч. Чи үнэр келвч. Ода чамла хамдан бээсн залу күн, чини залу биш, — гиж Исус келв. 19 — Ах Нойн минь, би үзжәнэв, Та ээлдэчд. 20 Мана өвк эцкнр эн уулур ирэд, Бурхнд сөгдж зальврдг билэ. Зуг тадн, евреймүд, Ерусалимд ирэд сөгдж мергх кергтэ гиж тоолнат, — гиж күүкд күн келв. 21 — Эгч, итк Нанд. Тиим цаг иржәнэ: эн уул деер биш, Ерусалимд биш, тадн Мана Эцкд сөгдж мөргхит! 22 Тадн Шамарья эмтн юундан мөргжэхэн эврэн меджэхшит. Бидн болхла кенд сегджэхэн йосндан меднэвидн. Юңгад гихлэ, Бурхн евреймүдэр дамжад эмтиг килнцэснь аврх. 23 Зуг цагнь өөрдж йовна. Цагнь лавта өөрдж ирв! Эн цагт Бурхнд йосндан сөгддг арh Бурхна Сәкүсн эмтнд өгх. Бурхнд тиим сөгдэчнр кергтэ. 24 Бурхн гисн — Сәкүсн. Терүнд сөгдсн улс Сәкүсэр дамжж деерэс төрх зөвтэ. Тиим эмтн Эцкд йосндан сөгдх, — гиж Исус хэрүднь келв. 25 — Бурхна илгэсн Аврач аашна гисинь би меднэв (Бурхна илгэсн Аврач — Христос). Тер ирхлэрн, маднд цугинь цээлhж өгх, — гиж күүкд күн келв. 26 Исус: — Би, чамла күүнджэсн күн, Бурхна илгэсн Аврачв, — гив. 27 Тер алднд сурһульчнр хэрү ирцхэв. Исусиг күүкд күүнлэ күүнджэхинь үзэд, цуһар алн болцхав. Зуг нег чигн күн яһад

терүнлэ күүндвт гиж сурсн уга. 28 Күүкд күн эврәннь буһшан худгин өөр үлдәһэд, хотн тал йовад әмтнд келв: 29 — Наартн, шулуһар йовтн, тадн мини жирһл бәэдлин тускар келж өгсн күүг үзхит. Тер Бурхна илгәсн Аврач болвзго? — гив. 30 Әмтн хотнас һарад, Исусур йовцхав. 31 Тер цагт Терүнә сурһульчнр: — Багш, буйн болтха, хотан уутн, — гив. 32 Зуг Тер: — Нанд тиим хот бәәнә, тер хот ямаранынь тадн медхшт, — гиж келв. 33 Тиигхлэ сурһульчнр: — Талдан күн Терүнд хот авч ирсн болвза? — гиж хоорндан күүндцхәв. 34 Мини хот гисн — Намаг Илгәснә таалыг күцәһэд, Нанд даалһсн кәдпмшиг күцәһэд төгсәх. 35 Кеер тәрә тәрсн цагт: дөрвн сар болчкад, урһцан хурах цаг ирх, гиж тадн келнәт, тиим эсий? Тегәд Би таднд келжәнәв: сәәнәр хәләтн! Тәрсн тәрән хурахд белн. 36 Тәрә хадх күн кәлстә олзан ода авчана. Мөңк жирһлин төлә урһцан хуражана. Тегәд тәрснь чигн, хадснь чигн хамдан байрлх. 37 Негнь тәрнә, дарукнь хадна гидгнь лавта батлгджана. 38 Тегәд Би тадниг кәлсән өгч эс кәдлсн юмиг хадж хуратн гиж илгәжәнәв. Тенд талдан әмтн кәлсән өгч кәдллә. Тадн болхла теднә кәдлмшт орлцад, урһцинь хуражанат, — гиж Исус үгән төгсәв. 39 — Мини кезәнә кесн юмиг Тер келж өгв, — гиж күүкд күн әмтнд келсмн. Тер учрар тер хотнд бәәсн кесг Шамарья улс Исуст иткдг болв. 40 Шамарья әмтн Исусур ирәд: — Буйн болтха, маднла үлдтн! — гиж сурв. Тегәд Тер теднлә хойр өдр бәәв. 41 Дәкәд кесг әмтн Исусин келсн үгд иткв. 42 — Түрүләд бидн чини келсиг соңсад итквидн. Ода болхла бидн Терүнд бийднь иткжәнәвидн, тер юңгад гихлә, бидн эврәннь чикәрн Терүг соңсвидн. Эн Күн орчлңгин Аврач гиж бидн йосндан иткжәнәвидн, — гиж тедн тер күүкд күүнд келцхәв.

Исус ямта куунә көвуг әдгәснь

43 Хойр өдр давхла Исус һалилья һазрур һарад йовв. 44 Тер юңгад гихлә, әәлдәчиг төрскн орн-нутгтнь күндлхш, — гиж урднь Исус эврән келсмн. 45 Исус һалильяд ирхлә, тер һазрин әмтн байртаһар

Исусиг тосв. Тер эмтн Ерусалимд Песахин нээрт Исусин кесн өвөрциг бас үзлэ. 46 Дэкэд Исус Халильян Кана гидг хотнур харад йовв. Урднь тенд Исус усиг чаһр кесмн. Тер цагт Капернамд хаана нег ямта күн бээдг бээсмн. Терүнэ көвүнь өнгрхин өмн өргнд бээж. 47 Исусиг Йудья һазрас халильяд ирсинь соңсад, тер ямта күн Исусиг олж авад: — Капернамд ирэд, мини көвүһим эдгәһит, тер үкн гижәнэ, — гиж Терүг эрэд сурв. 48 — Онц темдгүд Нанас үзлго, тадн иткхн угат! — гиж Исус терүнд келв. 49 — Ах Нойн, мини үрн үкэд уга бээтл шулуһар манаһур ирит! — гиж хаана ямта күн сурв. 50 — Хэр, герүрн йов. Чини көвүнчн эмд үлдх, — гиж Исус келв. Тер күн Исусин үгд иткэд, герүрн йовв. 51 Төрскн хотнурн йовж йовад, тер күн зууран эврәннь зарцнрлаһан харһв. — Тана үрнтн эрүл-менд бээнэ, — гиж тедн келв. 52 — Кезэ кевүм сән болв? — гиж тер зарцнрас сурв. — Өцклдүр үддэ нег часла халунь уурв, — гиж тедн хэрү өгв. 53 Көвүнчн эмд үлдх гисн Исусин үгин хөөн көвүнь эдгсинь эцкнь медв. Энүнэ хөөн тер эврәннь гер-бүлтәһән, зарцнртаһан Исуст иткв. 54 Тиигэд Йудьяс ирсәнннь хөөн Исус халильяд бээһэд хойрдгч темдг үзүлв.

Бэтсат гидг бийән уһадг бээрнд ку эдгэлһн

5:1 Удл ута еврей эмтнэ нэр болв, тер учрар Исус Ерусалимур йовв. 2 Ерусалимд «Хөөнэ үүдн» гидг ормин өөр еврей келэр Бетсэд гидг бийән уһадг бээрн бээж. Тенд тав дэкж зерглэд зогссн бахнс бээсмн. 3 Кесг гемтэ, сохр, доһлн болн тәкрсн һар-көлтэ эмтн тенд бас кевтж. 5 һучн нээмн жилдән өвчтэ нег күн эмтнэ заагт кевтж. 6 Исус терүг үзэд, кесгтән гемнжәхинь медэд: — Чи эдгхәр седжәнчи? — гиж сурв. 7 Өвчтэ күн хәрүднь: — Ах Нойн, усн көндрсн цагт уснд орхар седхлэ, нанд нөкд болдг күн ута. Намаг уснур эврән өөрдхәр седхлэ, күн мини өмнәһүр орж одна, — гив. 8 Тиигхлэ Исус терүнд: — Бос! Девскрән авад йов! — гив. 9 Атчмд тер күн эдгэд, эрүл-менд болж одв. Тер эврәннь девскрән авад эклэд йовв. Цуг эн бемб өдрлэ болв. 10 Тер учрар евреймүдин толһачнр эдгсн күүнд: — Эндр бемб

өдр, мана закаһар чи эврәннь девскрэн зөөж авч йовх зөв утач, — гив. 11 — Намаг эдгэсн күн: «Эврәннь девскрэн авад йов» гихэд нанд келлэ, — гиж тер хэрү эгв. 12 — Девскрэн авад йов гисн күн кен гидг күмб? — гиж тедн сурцхав. 13 Эдгсн күн Терүг кенинь эврэн медсн ута билэ, юнгад гихлэ, Исус олна заагт орад, тер даруны йовж одв. 14 Хөөннь Исус тер күүг сүмд үзэд: — Ода чи эрүл-менд болвч. Энүнэс хооран му юмн чамла учршгон төлэд дэжж килнц бичэ ке, — гиж келв. 15 Тер күн дэжж евреймүдин толһачнр тал йовад: — Намаг Исус эдгэв, — гив. 16 Исус бемб өдрлэ кү эдгэсн учрар евреймүдин толһачнр Исусиг көөдг болв. 17 — Эцкм оньдин көдлнэ, тегэд чигн Би бас көдлх зөвтэв, — гиж Исус келв. 18 Тиигхлэ евреймүдин толһачнр Исусиг алх цаг улм шунж хээцхэв. Тер юнгад гихлэ, Исус һанцхн бемб едрин йосиг эвдсн биш, дэжж Бурхиг «Мини Эцкм» гихэд Бийән Бурхнла эдлцүлсмн.

Бурхна өгсн йосн-кучн Исуст бээнэ

19 Исус евреймүдин толһачнрт иигж келв: — Үнэр таднд келжәнэв: Эцкиннь кесн юмниг эс үзтл, Көвүн эв-рә санаһарн юм кеж чадшго. Эцкиннь кежэх көдлмшиг Көвүн кенэ. 20 Эцк көвүндэн хээртэ болад, кежэх кергән Көвүндэн даалһж үзүлнэ. Тер энүнэс ик үүл үзүлх. Тегэд тадн икэр өврхит. 21 Эцк үксн эмтиг үкәрэснь босхж эм оруддгла эдлэр Көвүн дурта күүнд эм орулна. 22-23 Эцк эмтнэ зарһинь кехш. Көвүһинь Эцклэ эдл күндлэд, тевчтхэ гихэд, Тер Көвүндэн эмтнэ зарһ кех йос даалһж өгв. Көвүг эс тевчдг күн, Терүг илгэсн Эцкиг чигн тевчхш. 24 Үнэр таднд келжәнэв: Мини Үгим соңсад, Намаг Илгэсн Эцкдм иткснь мөңк жирһл эддх. Тер күн зарһла харһшго. Тер үклэс һарад, эмн жирһл эдлж. 25 Үнэр келжәнэв: цагнь өөрдж йовна, цагнь лавта ирв! Үксн эмтн Бурхна Көвүнэ дууһинь соңсх. Болв Терүг соңссн эмтн эмдрэд жирһлэн эдлх. 26 Эцк эмн жирһлин булг болдг эдлэр Көвүндэн эмн жирһлин булг болх арһ егв. 27 Тегэд чигн Бурхн Көвүндэн Зарһч болх йос егв. Юнгад гихлэ, Терүнэ Көвүн — Күмни Көвүн. 28 Бичэ энүнд

өвртн. Юңгад гихлэ, цагнь өөрдж йовна, үкэрт кевтсн, үксн эмтн Күмни Көвүнэ ду сонсад, үкэрэсн босж ирх. 29 Сэ кедгнь мөңк жирһл эдлхэр эмдрж босх. Му кедгнь зарһла харһулгдхин төлө эмдрж босх. 30 Би эврәннь йосарн юм күцэж чадхшв. Би Бурхна келсэр зарһинь кежэнэв. Мини зарһм үнн чик, юңгад гихлэ, Би эврәннь санан-седвэриг күцэхэр шунжахшв. Намаг илгэсн Эцкин санан-седвэриг күцэхэр унжанав.

Исусин тускар герчллһн

31 — Кемр Би эврэн Бийиннь тускар герчлсн болхла Мини үгд үнн уга. 32 Зуг Мини тускар келдг дэкэд герч бээнэ. Би меднэв: Терүнэ Үгнь йосн үнн. 33 Тадн Йоханур эмтиг илгэлэт. Тер Мини тускар үн келв. 34 Күүнэ герчллһн Нанд юмн биш болвчн, зуг тадниг аврулхин төлө Би энүг келжэнэв. 35 Йохан герл өгдг шатжах шам мет бээсмн. Тадн болхла цаг зуур терүнэ герл авад, герлин толянд байрлхар седлэт. 36 Зуг Би Йоханас даву ик герчтэв. Эцкм Нанд даалһж өгсн оln керг-үүл Би күцэжэнэв. Эн оln керг-үүл Эцкм Намаг илгэсинь герчлжэнэ. 37 Намаг илгэсн Эцкм Мини тускар бас герчлжэнэ. Терүнэ ду тадн төрүц сонсад утат. Терүнэ дүр тадн төрүц үзэд угат. 38 Тегэдчн тадн Терүнэ үг зүркндэн хадһлж бэрхшит. Тер Намаг илгэж гиснд тадн иткжэхшит. 39 Тадн Бурхна Бичг дасж умшнат. Энүгэр мөңк жирһл эдлхит гиж саннат. Зуг тенд Мини тускар бичэтэ! 40 Тер бийнь тадн мөңк жирһл эдлхин төлө Нан тал ирхэр седжэхшит. 41 Эмтнэ магтал нанд керго. 42 Зуг тадниг Бурхнд дурго болдгиг Би меднэв. 43 Би тадн тал Эцкиннь нерн деерэс ирв. Тадн Нанд оньган өгчэхшит. Эврәннь нерн деерэс хэр күн ирхлэ, тадн терүнд оньган өгнэт. 44 Яһж тадн Намаг иткж чадхмт? Тадн иткж чадшгот. Учрнь иим: тадн нег-негнәннь буульмж магталыг таасж ик чинрт тоолнат. Зуг ор һанцхн Бурхна магталыг авхар икэр хээжэхшит? 45 Намаг Эцкиннь өмн тадниг гемшэхэр ирж гиһэд бичэ сантн. Тадна нээлжэсн Моше тадниг гемшэх. 46 Кемр тадн Мошед итксн болхла, тадн Нанд чигн иткх билэт. Юңгад

гихлэ, тер Мини тускар бичлэ. 47 Зуг кемр тадн терүнэ бичснд эс иткхлэ, Мини келсн үгд яһж иткхмт?

Тавн миңһн ку цадхлһн

6:1 Энүнэ хөөн Исус һалилья (талданар келхд, Тиберэд) нуурин телтр көвэ тал һарад йовв. 2 Терүнэ ардас кесг эмтн дахж йовцхав, тер юңгад гихлэ, гемтэ эмтиг эдгэж, ямаран өвөрц юм Исус кесинь тедн үзлэ. 3 Исус уул деер һарад, тенд сурһульчнртаһан суув. 4 Еврей эмтнэ Песах гидг нэр өөрдж йовла. 5 Исус эргндэн хэләһэд, кесг эмтиг аашсинь үзэд, Пилипд келв: — Эн эмтиг цадххин төлэ альдас тиим дала өдмг хулдж авхмб? 6 Исус Пилипиг яһна гилч гиж сурв, бийнь болхла эврэн ю кехэн меджәлэ. 7 — Күн болһнд бичкн өдмгин тасрха өгхин төлэ маднд бүкл сардан көддэд меңг шиңгэх кергтэ, — гиж Пилип хэрү өгв. 8 Талдан нег Андрей гидг нертэ сурһульч, Шимон Пётрин дү: 9 — Энд тавн ичмән өдмгтэ болн хойрхн заһста нег көвүн бээнэ. Зуг цуг эн тиим оln күүнд дегд бичкн хот болжана, — гиж Исуст келв. 10 — Цуг эмтиг суулһ, — гиж Исус келв. Теднэ бээсн һазрт дала ноһан бээж, эмтн тер ноһан деер сууцхав. Тооһарн тедн тавн миңһн бээж. 11 Тегэд Исус өдмг авад, Бурхиг магтад, тер өдмгиг хуһлад, суусн эмтнд хуваһад өгв. Тиим кевэр Тер заһсиг бас хуваһад, эмтнд түгэж өгв. 12 Эмтн хотан идэд цадсн хөөн Исус: — Цуг үлдсн хотыг үрәшгоһар цуглуулж автн, — гиж сурһульчнртан келв. 13 Эмтн эклэд хотан идсн цагт тавхн ичмән өдмг бээж, зуг сурһульчнр хотын үлдл цуглуулхла, тернь хулсар гүрсн арвн хойр савд багтв. 14 — Эн күн орчлнд ирх Әәлдәч, — гиж эмтн Исусин кесн өвөрциг үзснэ хөөн келв. 15 Исус эмтиг цуглрад, Терүг авад хаана ширэд суулһхар седжәхинь медэд, һанцарн үлдхәр уул темцж һарад йовж одв.

Исус усн деегур йовжана

16 Асхн болхла, Терүнэ сурһульчнр уулас нур тал бууһад йовцхав. 17 Тедн оңһц дотр орад, нур һатлад, Капернам гидг балһснур

йовцхав. Харнһурсн цаг билэ, зуг Исус хэрү ирсн уга. 18 Ик салькнас кэлтэ нуурин дольган буслад, деврэд, усн ормасн харн гив. 19 Тавн-зурһан дуунад сурһульчнр оңһцар усч йовхла, генткн нуурин усн деегүр Исусиг теднэ оңһц тал йовж йовхинь үзв, тедн дегд икэр ээцхэв. 20 — Энтн бив. Бичэ ээтн, — гиж Исус теднд келв. 21 Тедн Исусиг оңһц дотр орулхар седхлэ, оңһц тер алднд дарунь кергтэ усна көвэд ирэд зогсв.

Исус — эмн-жирһлин хот

22 Маңгшуртнь нуурин телтр кевэд цуглрсн эмтн негхн оңһц бээсинь үзв. Исусиг оңһц дотр эс орсинь, сурһульчнр Терүн утаһар йовсинь эмтн медв. 23 Талдан оңһцс Тиберэдэс нег һазрур ирв. Тер һазрт урднь Исус Бурхиг магтж, өдмг эмтнд өгэд цадхасн билэ. 24 Исусиг болн терүнэ сурһульчнриг тенд олж чадлго тедн оңһцсд сууһад Исусиг хээһэд, Капернам балһснур темцж йовцхав. 25 Нуурин телтр көвэд Исусиг олж авад тедн: — Багш, Та кезэ нааран ирвт? — гиж сурцхав. 26 — Тадн онц темдг үзсн төлэд намаг хээжэхшит, зуг өдмг идж цадсндан хээжэнэт гиж Би үнэр келжэнэв. 27 Дарунь үрж оддг хотын төлэ бичэ кедлэд бээтн, зуг төрүц үрдго мөнк жирһл өгдг хотын төлэ көддж бээтн. Эн хотыг Күмни Кевүн таднд өгчэнэ. Яһад гихлэ, Тер Бурхн Эцкин онц темдгтэ, — гиж Исус хэрүднь келв. 28 — Бурхна керг-үүлмүд күцэхин телэ бидн ю кех зөвтэвидн? — гиж тедн сурцхав. 29 — Бурхна керг-үүл күцэх гиснь — Бурхна илгэсн күүнд иткх гисн үг, — гиж Исус хэрү өгв. 30 — Мадниг Танд итктхэ гихэд Та ямаран өвэрц юм үзүлж чадхвт? Терүг үзэд бидн иткх билэвидн. Ямаран кергиг күцэхвт? — гиж эмтн хэрүднь сурцхав. 31 — Мана өвк-эцкнр көдэ һазрт «манна» гидг хот иддг бээсмн. Энүнэ тускар Бурхна Бичгт иигж бичэтэ: «Идх едмг Бурхн теднд теңгрэс эглэ», — гицхэв. 32 — Моше биш Мини Эцкм таднд йосн өдмг теңгрэс белглжэнэ. 33 Эн Бурхна эдмг теңгрэс бууж ирэд, күмн эмтнд жирһл өгнэ, — гиж Исус эмтнд келв. 34 — Деед Эзн! Эн өдмгиг маднд оньдиндан өгч белглич! — гиж

тедн келцхэв. 35 — Би эмн жирһлин өдмгв. Нан тал ирсн күн төрүц өлсш ута. Нанд иткжэх күн төрүц ундасш ута. 36 Зуг Би таднд урднь келлэв: Тадн Намаг үзв чигн иткшгот! 37 Болв Эцкинм егсн улс Нан тал цугтан ирх. Иржэх күүг Би төрүц көөш угав. 38 Юңгад гихлэ, Эврәннь күсл күцэхэр биш Бийм илгэсн Эцкин күсл күцэхэр Би теңгрэс бууж ирлэв. 39 Намаг илгэсн Эцкин күсл иим: Нанд даалһсн эмтиг нег чигн кү геелго цугинь сүл өдрт эмдрүлхв. 40 Мини Эцкин күсл эн: Бурхна Көвүг үздг, Терүнд иткдг күн болһн мөңк жирһлтэ болх зевтэ. Сүл өдрт Би тедниг эмдрүлхв. 41 Терүг: Би теңгрэс буусн өдмг гисинь соңсад, евреймүд Исуст дурго болад һундлан келсмн. 42 — Эн Йосипин көвүн Исус биший? Бидн энүнэ эк-эцкинь меднэвидн, тиим эсий? Ода юңгад эн теңгрэс бууж ирв гихэд бээдмб? — гиж тедн келцхэв. 43 — Бичэ һундл өргтн, — гиж Исус келв. 44 — Намаг илгэсн Эцк угаһар, Нег чигн күн Нан тал ирж чадшго. Сүл едрт Би тер күүг эмдрүлхв. 45 Бурхн күн болһниг дасхх гиж ээлдэчнр бичж. Эцким соңсад, Терүнэ ном авч дассн күн Нан тал ирнэ. 46 Эцкиг күн үзв гиж би келжэхшв. Бурхнас ирсн һанцхн Тер Эцкиг үзсн мөн. 47 Иткдг күн мөңк жирһл эдлнэ. 48 Би — эмн-жирһлин өдмгв. 49 Тана өвк эцнр кедэд «манна» гидг хот идсн бийнь цуһар өңгрж одла. 50 Теңгрэс ирсн өдмг онц йилһрнэ. Энүг эдлсн күн төрүц үкш уга. 51 Би теңгрэс ирсн өдм өдмгв. Эн өдмгиг эдлсн күн мөңк жирһлтэ болх. Эн өдмг — Мини цогц-махмуд. Эн махмудан Би орчлңгин эмн жирһлин төлө өгхв. 52 — Эврәннь махмудан идтхэ гиж маднд тер яһж өгхмб? — гиж евреймүд заагт зүтклдэн болв. 53 — Үнэр келжэнэв. Кемр тадн Күмни Көвүнэ махмудынь эс эдлхлэ, Терүнэ цусинь эс уухла, бий дотран эмн жирһл уга бээхит. 54 Махмудм эдлсн күн, цусим уусн күн мөңк жирһлтэ болна. Сүл өдрт Би терүг эмдрүлхв. 55 Юңгад гихлэ, цогц бийим — йосн хот. Мини цусм — йосн ундн. 56 Мини цогц бийиг эдлдгнь, Мини цусиг уудгнь Нанла негдэд бээнэ. Би терүнлэ негдэд бээнэв. 57 Би эм өгчэх Эцкин илгэсн күмб. Тер Нанд жирһл өгчэнэ. Цогц бийим эдлжэх күүнд Би тийгж жирһл өгхв. 58 Эн теңгрэс бууж ирсн өдмг мөн. Эн тана эцнр идсн манна гидг хот биш. Тедн идсн

бийнь өнгрж одла. Зуг эн өдмг эдлжэх күн мөнкиндэн бээх, — гиж Исус теднд цээлһж келв. 59 Исус Капернам хотнд евреймүдин хурлд эмтиг сурһжасн цагт келсмн.

Меңк жирһлин туск уг

60 — Эн ном дегд кецү. Кен энүг соңсж чадхмб? — гихэд Исусиг соңссн әмтнә кесгнь келцхәв. 61 — Эн ном таднд харш болжану? — гиж Исус сурһульчнриг хәрүцжәхинь медәд келв. 62 — Күмни Көвүг урднь бәәсн орн-нутгурнь хәрү өөд болж ниссинь үзәд тадн ю келхмт? 63 Бурхна Сәкүсн әм өгнә, күүнә чидл олз өгхш. Мини келсн үг әм жирһл өгдг Сәкүсәр дүүргнә. 64 Зуг тадна зәрмнь иткжәхш. (Исус Терүнд эс иткх болн хөөтндән урвх күүнә тускар урдаснь медлә.) 65 Кедр Эцкм күүнд зая эс хээрлсн болхла, тер Нанур ирж чадшго. Терүнә тускар Би таднд келләв, — гиж цааранднь Исус келв. 66 Эн үгмүдин хөөн сурһульчнрас кесгнь Терүг үлдәһәд хәрү йовж одв, дәкж тедн Исусиг дахсн уга. 67 — Тадн Намаг бас үлдәх санатавт? — гиж Исус арвн хойр сурһульчнрасн сурв. 68 — Деед Эзн минь, бидн кен тал йовхмб? Мөңк жирһл өгдг үгмүд Танд бәәнә. 69 Та Бурхнас ирсин гидгиг бидн медж иткләвидн, — гиж Шимон Пётр хәрү өгв. 70 — Таднит, арвн хойр кү Би йилһж эс авлу? Зуг тадна заагас негнтн — эрлг! — гиж Исус келв. 71 Тер Шимон Йуда Искериотин тускар келж. Тер арвн хойрин негнь болсн бийнь, зуг хөөннь Исусас урвж.

Исус болн Терүнә дуунр

7:1 Энүнә хөөн Исус һалилья һазр эргәд йовж йовла. Евреймүдин толһачнр Терүг алх арһ хәәсн төләд Исус Йудья һазриг эргж йовхар седсн уга. 2 Сегмүд гидг евреймүдин нәр өөрдж йовла. 3 — Эн һазриг үлдәһәд, Йудья һазр темцж байр-нәәрт йов. Тенд сурһульчнр Чини кежәх өвәрц йовдлмуд үзх. 4 Эврәннь кесн үүлән нуухмн биш, әмтнд медүлхин төлә терүгән үзүлх кергтә. Бәәсэн олн әмтнд үзүл, — гиж Исусин дүүнр Терүнд келцхәв. 5 Исусин дүүнр чигн Терүнд

иткдго бээж. 6 — Зөвтө цаг Нанд ирэд ута. Таднд болхла ямаран чигн цаг амр. 7 Таднд орчлң дурго болж чадшго. Тедн Нанд дурго. Тер юңгад гихлэ, Би теднэ хар йовдлмуд илдкж герчлнэв. 8 Тер нээрт тадн эврэн йовтн, Би тиигэрэн йовшгов, Мини цаг ирэд ута, — гиж Исус хэрүднь келв. 9 Тиигж келэд Тер халильяд үлдв.

Исус сегмуд гидг нээрт

10 Терүнэ дүүнр нээрт йовцхав. Тедниг йовсна хөөн Исус Бийән медүллго нууцар бас тиигэрэн йовв. 11 Евреймүдин толһачнр нээрт ирэд: — Тер күн яһсмб? — гихэд Исусиг хээцхэв. 12 Терүнэ тускар эмтн кесгтән шимлдж күүндцхэв. Зөрмнь: — Тер сән күн, — гиж келв. Зөрмнь: — Уга, тер эмтиг меклжәнэ, — гив. 13 Зуг цуһар евреймүдин толһачнрас эәһэд, Терүнэ тускар күн илэр келсн ута. 14 Нээрин өрәлнь давсна хөөн Исус сүмд ирэд эклэд әмтиг сурһв. 15 Евреймүдин толһачнр өврэд: — Эн күн альдас тиим дала юм меддг болхв? Энтн сурһуль дасдг ута биләлм? — гиж нег-негнәсн сурцхав. 16 — Эн ном Мини биш, Намаг илгәсн Бурхна ном. 17 Терүнэ таалыг күцәхәр седснь эн номиг Бурхнас эс гиж Бийәсм һарчахиг лавта медх. 18 Эврәннь нернәс келжәхнь эврәннь нерән дуудулхар шунна. Зуг Илгәснә нериг дуудулхар шунж йовсн күн йосн үн келнә. Түүнд худл ута. 19 Таднд Моше закан өгсн биший? Зуг таднас негн чигн күн тер закаг күцәжәхш. Тадн юңгад Намаг алхар седжәхмт? — гиж Исус сурв. 20 — Чи хар сәкүстәч. Кен Чамаг алхар седжәхмб? — гиж әмтн хәрүцв. 21 — Би негхн әвәрц үзүлв. Тадн цуһар алң болжанат. 22 Моше болхла, таднд әмн бийин үзүрин керчлһнә авъяс өгв. Тер авъяс түрүлэд Мошеһәс биш өвк-эцкнрәс ирв. Тегэд тадн бемб өдрлә нилх кәвүдин әмн бийин үзүр керчнәт. 23 Кемр Мошен закаг эвдшгоһар тадн бемб өдрлә нилхдин әмн бийин үзүринь керчдг болхла, Намаг бемб едрлә күүнә бий цогциг эдгәв гихэд юңгад тадн уурлжахмбт? 24 Өңг-зүсәрнь кү бичә гемшәтн. Үнн чикәр кү гемшәтн, — гиж Исус хәрүднь келв.

Бурхна илгэсн Аврач кемб?

25 Тер цагт Ерусалимд бээдг зэрм эмтн: — Эн күүт толһачнр алхар седжэнэ эсий? 26 Хэлэтн, Энтн эмтнлэ күүнджэнэ, болв толһачнр Энүг хөрж үг келхш. Энүг Бурхна илгэсн Аврач гиж тедн бас санжахий? 27 Эн күн альдас ирсинь бидн меднэвидн. Зуг йосн Христос альдас ирхинь күн медхш, — гиж келцхэв. 28 — Тадн Намаг медвт. Намаг альдас ирсиг бас медвт. Үннэрий? Би эврэ санаһарн ирсн утав. Намаг Илгэснь йосн үннч. Зуг тадн Терүг медхшт. 29 Би Терүнэс ирв. Тер учрар Би Терүг меднэв. Тер Намаг илгэв, — гиж Исус эмтиг сүмд сурһсн цагт чаңһар келв. 30 Тиигхлэ тедн Исусиг бэрж авхар седв. Зуг нег чигн күн Исусиг көндөж чадсн ута. Учрнь иим: Исусин цагнь ирэд ута бээж. 31 Олн заагт ик зунь Терүнд иткэд келв: — Бурхна илгэсн Аврач ирхлэрн Эн күүнэ үзүлсн онц темдгүдэс үлү онц темдгүд үзүлхий?

Харулчнр Исусиг бэрж авхар илгэгдснь

32 Исусин тускар эмтн ю шимлдж келжэхинь паршмуд сонсв. Терүг бэрж авхар паршмуд, ах гелцгүд харулчнриг илгэв. 33 Исус иигж келв: — Би таднла невчкн зуур бээжәһэд, Намаг Илгэснд йовхв. 34 Тадн Намаг хээхит. Мини бээх һазр тал тадн ирж чадшго учрас Намаг олж чадшгот. 35 Евреймүдин толһачнр нег-негнэсн: — Мадниг ирж чадшго гиһэд альдаран эн йовхар седжэхмб? Грек эмтиг сурһхар еврей эмтн бээсн грек балһсд тал Эн йовжахмн болвза? 36 «Тадн Намаг хээхит, зуг олж чадшгот. Мини бээх һазр тал тадн ирж чадшгот» гисн үтмүд юн үгмүд болжахмб? — гиж сурцхав. 37 — Ундасжаснь Нан тал ирэд уутн. 38 Юнгад гихлэ, Бурхна Бичгт иигж бичэтэ: «Нанд иткдг күүнэ дотрас эм өгчэх усна булг урсад бээх», — гиж Исус байрин алдр сүл өдртнь босад, чаңһ дууһар келв. 39 Энд Исус Эрүн Сәкүснэ тускар келлэ. Терүнд итксн күүнд, хөөннь Эрүн Сәкүсн өггдх. Итксн улст тер цагт Эрүн Сәкүсн өггдсн ута билэ, юнгад гихлэ, Бурхн Исусиг өөдлүлэд ута бээж.

Эмтн хоорндан энгрснь

40 Зэрмнь Исусин үгмүд соңсад: — Эн йосн ээлдэч! — гиж келцхэв.
41 Зэрмнь: — Эн Бурхна илгэсн Аврач, — гив. — Бурхна илгэсн Аврач халильяс ирхий? 42 Бурхна Бичгт, Бурхна илгэсн Аврач Давидин тохмас Давид бээсн Бетлехем гидг хотнас ирхинь бичэтэ эсий? — гиж зэрмнь келцхэв. 43 Эмтн Исусин тускар келэд хоорндан энгрж. 44 Зэрмнь Терүг бэрж авхар седлэ, зуг нег чигн күн Исусиг көндөсн уга.

Евреймудин толһачнрин эс итклһн

45 Аш сүүлднь, паршмуд болн ах гелнүгүд тал харулчнр хэрү ирцхэв. — Юнгад тадн Исусиг бэрж эс авч ирвт? — гиж паршмуд болн ах гелнүгүд сурцхав. 46 — Нег чигн күн урднь тиигж келсн уга билэ, — гиж харулчнр хэрү өгв. 47 — Тер тадниг бас меклчкви? — гиж паршмуд сурв. 48 — Ода күртл толһачнрас болн паршмудас нег чигн күн итксн уга биший? 49 Уга. Зуг тер эгл эмтн закана тускар ю медх билэ? Теднд Бурхна харал тусж, — гиж паршмуд хэрүднь келв. 50 Паршмуд заагт бээсн Никодим гидг күн бээж. Тер урднь Исусла харһдг бээсмн. 51 — Мана Закаһар бидн түрүлэд күүг ю кесинь медхэр сурж соңслго бээж, зарһинь кех зөв угавидн, — гиж Никодим келв. 52 — Чи бас халильясвч? Бурхна Бичг сөөнөр дасад медхич, халильяс нег чигн ээлдэч төрүц ирхш, — гиж тедн Никодимд хэрү өгв. 53 Энүнэ хөөн цуһар гер талан тарад йовцхав.

Аля куукд куунэ йовдлын тускар

8:1 Исус олив модна уул темцж һарад йовв. 2 Өрүн өрлэ Тер дэкн сүмин һаза ирэд зогсв. Цуһар Терүнэ өөр ирэд хурцхав. Исус сууһад эмтнд сурһмж өгэд дасхв. 3 Тер цагт ном цөөлһэчнр болн паршмуд нег аля йовдл һарһад бэргдсн күүкд кү Терүнүр авч ирэд, эмтнэ чирэд зогсав: 4 — Багш, эн күүкд күн хуульч йовдл кеһэд бэргдв. 5 Мошен закон тиим күүкд улсиг чолуһар цокж алтн гиж закана. Та ю

келнэт? — гиж тедн сурв. 6 Тедн Исусиг серж тиигж сурцхав. Цааранднь Исусиг хэрүһинь өгч эс чадхлань, үгэрнь бэрж авхар эн күүндвриг эклцхэв. Зуг Исус екәһэд, һазр деер юм бичэд суув. 7 Тедн зогсн бээж суржахла, Исус босад: — Тадн дундас килнц угань хамгин түрүн энүг чолуһар шивтн, — гиж келв. 8 Дәкәд Исус саак кевәрн өвдглж сууһад һазр деер юм бичв. 9 Энүг соңссн әмтнәс настань экләд йовв, тедниг дураһад наадкснь бас дахлдв. Исус һанцарн үлдв. Күүкд күн Исусин өмн зогса бээж. 10 — Тедн цуһар яһсмб? Зарһичинь кех нег чигн күн үлдсн угай? — гиж Исус ормасн босад күүкд күүнд келв. 11 — Уга күн үлдсн уга, Ах Нойн! — гиж тер күүкд күн келв. — Би бас зарһичн кешгов. Эврәннь хаалһарн йов, эн өдрәс авн килнц бичә ке, — гиж Исус хәрүднь келв.

Исус — орчлңгин герл

12 — Би орчлңгин герлв, Намаг дахжах күн харңһуд йовшго. Тер әмн жирһл өгдг герлтә болна, — гиж хөөннь Исус дәкн әмтнд келв. 13 — Чи эврән Бийиннь тускар герчлжәнәч. Чини герчллһн йосн үнн биш, — гиж паршмуд өмнәснь келцхэв. 14 — Би Бийиннь тускар герчлв чигн, Мини үгмүд үнн. Юңгад гихлә, Би альдас ирсән альдаран йовхан меднәв. Тадн Намаг альдас ирсинь альдаран йовжахинь төрүц медж бээхшит. 15 Тадн әмтнә хәләцәр кү гемшәнәт. Би кү төрүц гемшәхшв. 16 Кедр Би кү гемшәхләрн үнн кевәр гемшәнәв. Юңгад гихлә, Би һанцарн бишв. Намаг илгәсн Эцкм Нанла хамдан бәәнә. 17 Тана закаһар хойр күн герчлхлә, теднә герчллһн чик болна. 18 Би Бийиннь тускар герчлжәнәв. Намаг илгәсн Эцкм бас Мини тускар герчлжәнә, — гиж Исус хәрүднь келв. 19 — Чини Эцкчн альдв? — гиж тедн сурцхав. — Тадн Намаг чигн болн Мини Эцким медхшит. Кедр тадн Намаг медсн болхла, Мини Эцким бас медх биләт, — гиж Исус келв. 20 Цуг энүнә тускар Исус сүмд бәрц өгдг хәәрцгин өөр зогсж келсмн. Исусин цагнь ирәд уга бээж, тер учрар нег чигн күн Исусиг бэрж авсн уга.

Мини йовх һазрт тадн ирж чадшгот

21 Дәкәд Исус иигж келв: — Ода Би йовжанав. Тадн Намаг хәәһәд, килнцдән даргдад үкхит. Мини йовх һазрт тадн ирж чадшгот. 22 — Энтн әмән хорлж үкхәр седжәх бәәдлтә. Юңгад гихлә, Мини йовх һазрт тадн ирж чадшгот гиж келсмн, — гиж евреймүдин толһачнр хоорндан күүндцхәв. 23 — Тадн цуһар дора бәәсн орчлңгас болжанат. Би болхла деед теңгрәс. Тадн эн орчлңгин әмтн. Би эн орчлңгин бишв. 24 Би таднд келлүсв: Тадн килнцдән даргдад үкхит. Кемр тадн Би бәәнәв гисн үгдм әс иткхлә, тадн килнцдән даргдад үкхит, — гиж Исус цаарандан келв. 25 — Тиигхлә Та кембт? — гиж тедн сурцхав. — Ю хәәж би таднла күүндәд суунав? 26 Кесг юм тадна тускар Би келж гемшәж чадх биләв. Зуг Намаг Илгәснәс соңссан орчлнд герчлж келжәнәв. Намаг Илгәснә йосн үннч, — гиж Исус келв. 27 Тедн Исусиг Эцкиннә тускар келжәхинә медсн уга. 28 Цааранднә Исус келж бәәнә: — Күмни Көвүг деер һарсна хөөн Би бәәнәв гисм лавта медж авхит. Эврәннә дурарн Би юм кежәхшв. Эцкимм дасхсн үгиг Би әмтнд цәәлһж келнәв. 29 Намаг Илгәснә Нанла хамдан бәәнә. Терүнд кергтә юм Би оньдин кедв. Тегәд Намаг һанцараһим Тер үддәхш. 30 Эн үгмүдин хөөн кесгнә Исуст иткв.

Исус килнцәс яһж сулдж һархин тускар келжәнә

31 — Кемр тадн Мини номар бәәхлә, тадн йосн Мини сурһульчнр болжанат. 32 Тадн йосн үнниг медхит, үнн тадниг сулдхх, — гиж Исус Бийднә итксн евреймүдт келв. 33 — Бидн Абрахамин үлдл тохм, бидн нег чигн күүнд заргдад мухла болж йовсн утавидн. Яһж чи мадниг сулдххмч? — гиж тедн хәрүднә келцхәв. 34 — Үнәр келжәнәв, килнц кежәх күн килнцин мухла болжана. 35 Мухла күн герт оньдиндан бәәж чадхш. Көвүн болхла мөңкиндән гертән бәәнә. 36 Кемр Көвүн тадниг сулдххла, тадн йосндан сул болхит. 37 Тадниг Абрахамин үлдл тохминә меднәв. Мини үгм тадна седклд багтжахш, тер учрар тадн Намаг алх санатат. 38 Би таднд Эврәннә

Эцкэсн үзсн юман келжэнэв. Тадн болхла бас эврэннь эцкэсн соңссн юман келжэнэт, — гиж Исус теднд келв. 39 — Мана эцкмдн Абрахам, — гиж тедн хэрү өгв. — Кемр тадн Абрахамин үрдүд болсн болхла, тадн Абрахамла эдл кергэн күцэх билэт. 40 Таднд Бурхнас соңссн үнниг келжэнэв. Тадн Намаг зөрц алхар седжэнэт. Абрахам тиигж бээдго билэ. 41 Тадн эврэннь эцкиннь кесн юмиг кежэнэт, — гиж Исус келв. — Мадн нег эцктэвидн, Бурхн Бийнь — мана Эцк. Бидн йосар харсн үрдүд, — гиж тедн келцхэв. 42 — Кемр Бурхн тадна Эцк бээсн болхла, тадн Нанд дурта болх билэт. Юнгад гихлэ, Би нааран Бурхнас ирлэв. Эврэннь санаһарн Би ирсн уга билэв, Намаг Бурхн илгэв. 43 Мини келсн үгм тадн яһад эс меднэт? Яһад гихлэ, тадн Намаг соңсхар седжэхшит. 44 Тана Эцктн — эрлг. Тегэд тадн терүнэ дурар бээхэр седжэнэт. Тер кезэнэс авн үннлэ таардго алач бээсмн. Терүнд төрүц үнн уга, худлч болн худлын эцк. Тегэд худл терүнэ төрсн келн. 45 Би үнэр келжэнэв, тер учрар тадн Нанд иткжэхшт. 46 Тадна негнтн Намаг килнц һарһвч гиж гемшэж чадхий? Би таднд үнэр келхлэ, юнгад тадн эс иткнэт? 47 Бурхна үрдүд Терүнэ үг соңсна. Тадн Бурхна биш болад, Мини үгм соңсжахшт, — гиж Исус келв.

Абрахамас түрүлэд Би бээлэв

48 — Чи хар сәкүстә Шамарья күнч гийһэд бидн чикэр келсн биший? — гиж евреймүд Исуст келцхэв. 49 — Би хар сәкүстә бишв. Би эврэннь Эцкән тевчнэв. Тадн Нанд му нер өгчэнэт. 50 Би Эврэннь нерэн туурулхар седжэхшв. Зуг Мини туурмж хээжэх, Мини төлө өмтнэ зарһинь кедгнь бээнэ. 51 Үнэр келжэнэв: Үгм дахж күцэдг күн мөнкиндән үкшго! — гиж Исус келв. 52 — Чамаг хар сәкүснд эзлгдсинь ода бидн йосндан үзжэнэвидн! Абрахам болн ээлдэчнр кезэнэ өнгрж одв. Зуг үгим дахж күцэдг күн мөнкиндән үкшго гиж Чи келжэнэч. 53 Чи мана Абрахам эцкэс деер болжахмчи? Абрахам өңгрв, болв ээлдэчнр кезэнэ өңгрж одв. Бийән кенд тоолад тиигжэхмч? — гиж евреймүд хээкрцхэв. 54 — Кемр Би Бийдән

туурмж хээжэхлэ, тер туурмж юмн биш. Зуг Мини Эцкм Намаг туурулжана! Тадн Терүг Мана Бурхн гиж дууднат! 55 Тадн Терүг төрүц меддго билэт. Зуг Би Терүг меднэв. Кемр Би Терүг медхшв гиж келсн болхла, Би таднла эдл худлч болх билэв. Зуг Би Терүг меднэв. Терүнэ келсн үгмүдиг соңсж күцэдв. 56 Абрахам эцктн цагм үзх гиж байрлжала. Цагм үзэд ик байрта үлдв, — гиж Исус хэрү өгв. 57 — Чи эврэн тэв күрэд угач, яһж Абрахамиг үзсмч? — гиж евреймүд сурцхав. 58 — Абрахам экиннь геснэс һарад уга бээтл Би Бээлэв, үнэр таднд келжэнэв, — гиж Исус келв. 59 Тиигхлэ тедн чолу авад Исус тал шивж алхар седв. Зуг Исус теднэс бултад, сүмэс һарад йовж одв.

Сохр ку эдгэлһн

9:1 Нег дэжж Исус йовж йовад, нег сохр кү үзв. Тер күн һарснас авн сохр бээж. 2 — Багш, эн күн юңгад сохр һарсмб? Кен килнц һарһсмб, эн күн аль энүнэ эк-эцкнь? — гиж сурһульчнр Исусас сурцхав. 3 — Тер чигн, эк-эцкнь чигн килнц һарһсн ута. Эн күүг эдгәһэд, әмтнд Бурхна күчиг үзүлхәр цуг эн учрв. 4 Өдр чиләд ута бээтл бидн Намаг Илгәсн Эцкин керг күцәх зөвтәвидн. Удл ута харһу сө болх, тиигхлә күн юм кеж чадшго. 5 Эн һазр деер бээтл Би нарт делкән герл болжанав, — гиж келәд, 6 Исус һазрт нульмад, шүлсәрн шора зуурч, сохр күүнә нүднднь түркв. 7 — Ода болхла йовад Шилоах гидг уснд нүүрән уһачк, — гиж Тер сохр күүнд келв. (Шилоах гисн — «Илгәгдсн» гисн үг.) Сохр күн йовад, нүүрән уһаһад ирхләрн юм үздг болв. 8 Хам-хоша бээсн әмтн терүг һууль һууж йовсинь үзсн әмтн сурцхав: — Эн һууль һуужасн күн мөн биший? 9 Зәрмнь: — Тертн Бив, — гив. — Уга, әнтн терүнә дүрстә, — гиж зәрмнь келцхәв. Эдгсн күн бийнь келв: — Тертн Бив. 10 — Яһж чамд нүднә харан орв? — гиж тедн сурцхав. и Тер хәрүднь: — Исус гидг нертә күн шораһар бальчг кеһәд мини нүднд түркв. Дәкәд Тер Шилоах гидг уснд нүүрән уһа гив. Би йовад нүүрән уһасна хөөн үздг болв. Нүднә харан нанд орв, — гиж келв. 12 — Тер күн альдв?

— гиж тедн эдгсн күүнэс сурцхав. — Би меджэхшв, — гиж эдгсн күн хэрү өгв.

Паршмуд харан орсн кууг мөшкжэнэ

13 Тиигхлэ тедн харан орсн күүг паршмуд тал авч ирцхэв. 14 Бемб өдр Исус шүлсэрн шора зуурч, эн күүнэ нүдн хара орулв. 15 Паршмуд тер күүнэс: — Нүднэ харан чамд яһж орсмб? — гиж сурцхав. — Исус мини нүдм бальчг түркв, би нүүрэн уһаһад юм үздг болв, — гиж эдгсн күн келв. 16 Зэрм паршмуд: — Чамаг эдгэсн күн Бурхнас ирсн күн биш, юнгад гихлэ, энтн бемб өдриг бемб өдр гиж тоолхш, — гицхэв. Зэрмнь болхла: — Килнцтэ күн тиим өвэрц юмиг яһж чадхмб? — гиж келцхэв. Теднэ хэлэц-тоолврнь онц йилһгдв. 17 — Нүднчн Тер сексн учрас чи эврэн Терүнэ тускар ю келж чадхмч? — гиж паршмуд эдгсн күүг мөшкв. Эдгсн күн: — Тер ээлдэч, — гив. 18 Евреймүдин толһачнр терүг сохр бээсинь, дэкэд нүднэ харан орсинь итксн ута бээж. Тедн тер күүнэ эк-эцкинь дуудхар шиидв. 19 — Эн тана көвүнтн биший? Энүнэ тускар тадн сохр билэ гисн бишийт? Ода яһж энтн юм үздг болсмб? — гиж тедн сурцхав. 20 — Эн мана көвүн гиж бидн таньжанавидн, энүг һарснас авн сохр бээсинь меднэвидн. 21 Зут яһж эн юм үздг болсинь, кен нүдинь эдгэсинь бидн медхшвидн. Энүт бийэснь суртн. Мана көвүн нас күрсн күн, хэрүһинь таднд өгч чадх, — гиж эк-эцкнь келцхэв. 22 Эк-эцкнь евреймүдин толһачнрас эәһэд тиигж келцхэв. Юнгад гихлэ, Исусиг Бурхна илгэсн Аврач гиж тоолснь хурлас көегдх гисн шиидвр евреймүдин толһачнр батлсмн. 23 Тегэд чигн эк-эцкнь: — Энтн наста күн, бийэснь суртн, — гицхэв. 24 Паршмуд эдгсн күүг хойрдад дуудв. — Бурхна чирэд үн кел! — гиж тедн келцхэв, — Чамаг эдгэсн күүг килнцтэһинь бидн меднэвидн. 25 — Терүг килнцтэ эс килнцтэһинь би медхшв. Урднь сохр бээһэд, дэкэд харата болсан сээнэр меднэв! — гиж эдгсн күн келв. 26 — Тер чамд ю кесмб? Чини нүдичн яһж эдгсмб? — гиж паршмуд мөшкв. 27 — Би таднд келж өглэв, тадн соңссн утат. Намаг дэкн-дэкнэс соңсх

дурн таднд яһад күрэд бээнэ? Тадн Терүнэ сурһульчнр болхар бас седжэхмбт? — гиж тер хэрү өгв. 28 Тиигхлә тедн эдгсн күүг шоодад, му келэд: — Чи эврэн Терүнэ сурһульч! Бидн Мошен сурһульчнрвидн! 29 Бурхн Мошелә күүндсинь бидн меднәвидн. Эн күүнә тускар болхла бидн юм медхшвидн. Эн күн альдас ирсинь медхшвидн, — гиж тедн келцхәв. 30 — Я-а! Акад юмб? Терүг альдас ирсинь чигн медхшийт? Тертн болхла мини нүдм секв. 31 Бурхн килнцтә әмтиг сонсхш гисинь бидн меднәвидн. Бийинь күндлдг Терүнә дурар бәэдг әмтиг Бурхн соңсдгинь бидн меднәвидн. 32 Орчлң үүдснәс авн ода күртл кен чигн һарснас авн сохр күүнд хара орулдгинь соңсгдад ута. 33 Кемр Эн Күн Бурхна Күн биш болсн болхла, Тер иим юм үзүлж чадшго билә, — гиж эдгсн күн хәрүднә келв. 34 — Чи килнцтә төрләч. Маднд уха заах зөв чамд ута, — гиж хәрүднә келэд, тедн эдгсн күүг хурлд ирдгинь уурулв.

Сохр ухан-седклин тускар

35 Исус эдгсн күүг паршмуд тиигсинь соңсад, терүг олж авад сурв: — Чи Күмни Көвүнд иткжәнч? 36 — Тертн кемб, Ах Нойн минь? — гиж тер сурв, — Келтн нанд, би Терүнд иткнәв. 37 — Чи ода Терүг үзжәнәч, Тер чамта күүнджәнә, — гиж Исус келв. 38 Тиигхлә күн: — Деед Эзн, би иткжәнәв, — гихәд Исуст сөгдж мөргв. 39 Исус келв: — Сохр әмтнд хара орулж, харата әмтиг сохрулхар Би эн орчлнд ирв. 40 Өөрнә бәәсн паршмуд: — Бидн бас сохр болжахмб? — гихәд сурцхав. 41 Исус: — Кемр тадн сохр бәәсн болхла, тадн эврәннә килнцдән буру ута болх биләт. Зуг тадн үзжәнәвидн гисн төләдән, тадн деерән буру толһатат.

Хөөчин тускар

10:1 — Хөөнә хаша дотр үүдәр орлго талдан орм олж авад орсн күн — хулхач болн деермч, гиж үнәр таднд келжәнәв. 2 Хашан үүдәр орсн күн эврәннә хөөдин хөөч мөн. 3 Манач терүнд үүдинь секнә.

Хөд дууһинь соңсна. Тер эврәннь хөөдөн нерэрнь дуудад, дахулад
һазаран һарна. 4 Хөөч хөөдөн цутлулж һазаран һарһад, бийнь өмннь
һарад уралан йовна. Эзнэ ду таньдг учрас тедн хөөчин ардаснь дахж
йовна. 5 Күүнэ ду хөд медхш. Тегэд күүнэ күүг тедн дахшго. Хөд
гүүһэд тарад йовж одх, — гив. 6 Исус үлгүрлж келсмн, зуг Терүнэ
үгмүдин чинринь эмтн медж чадсн ута.

Исус — сэн хөөч

7 — Би хөөнэ хашан үүднв, гиж үнэр келжәнэв. 8 Нанас урд ирсн
эмтн хулхачнр болн деермчнр. Хөд тедниг соңссн ута. 9 Би лавта
үүднв. Нанар дамжж орж һарснь эмэн харсж аврх. Тер күн орж
һарад, урһцта-идгтэ һазр олж авх. 10 Хулхач юм хулхалхар, алхар,
күүчж хамхлхар ирнэ. Би болхла эмтнд йосн элвг-делвг эмн-жирһл
өгхэр ирв. 11 Би сэн хөөчв. Сэн хөөч эврәннь хөөдин төлө эмэн
эрвллго өгхдэн белн. 12 Ялч болхла йосн хөөч биш. Хөд терүнэ
биш. Ялч аашсн чоһыг үзхлэрн, хөөдиг хаяд, эәһэд, зулад йовж
одна. Тиигхлэ чон зэрм хөөдиг шүүрч авна, наадкснь тарад йовж
одна. 13 Ялч йосн хөөч биш, тер ялч болад зулж одна. Тер хөөдиг
йосндан асрж хэлэхш. 14-15 Би сэн хөөчв. Эцк Намаг меднэ, Би
Эцкән бас меддв. Тиим кевэр Би Эврәннь хөөдөн сөөнэр меднэв,
хөөдм Намаг бас меднэ. Эврәннь хөөдин төлө Би эмэн эрвллго
өгхдэн белнв. 16 Талдан хөд Нанд бас бөөнэ. Тедн эн сүргин хөд
биш. Би тедниг бас дахулж авч ирх зөвтөв. Тедн Мини ду бас соңсх.
Удл уга цуһар нег хөөчтэ нег сүрг болх! 17 Би эмэн хэрү авхин төлө
өгхдэн белнв. Тер учрар Эцк Нанд хөөртэ. 18 Кен чигн Мини эмиг
булаж авч чадшго. Би эврэ дурарн эмэн өгчәнэв. Эмэн өгх чигн,
хэрү авх чигн йосн Нанд бөөнэ. Тиигж Нанд Эцкм закв, — гиж Исус
келв. 19 Эн үгмүдин хөөн еврей эмтн хоорндан хувагдв. 20 — Эн —
ухань көндрсн хар сәкүстэ күн. Ю хөөж Энүг соңсжант? — гиж
кесгнь келцхэв. 21 Зэрмнь: — Хар сәкүснд эзлгдсн күн тиигж
келшго. Хар сәкүсн сохр күүнд хара орулж чадхмб? — гицхэв.

Евреймуд Исуст иткжэхш

22 Үвл болсмн. Ерусалимд хол сүм шинрүлж нерэдлһнэ нэр болв.
23 Исус сүмин хашан дотрк Соломон хаана нертэ бээрн дотраһар
йовж йовла. 24 Эмтн Терүнэ өөрнь зогсв. — Кедү күртл Чи мадниг
өврүлж зовахмч? Кемр Чи Бурхна илгэсн Аврач болхла, тодрхаһар
кел маднд, — гиж тедн келцхэв. 25 Исус иигж келв: — Би таднд
келлэв. Тадн итксн угат. Эцкинм күчэр кесн йовдлмуд Мини тускар
келжэнэ. 26 Тадн Мини хөд биш болсн учрас Нанд иткжэхшит. 27
Мини хөд дууһим соңсна. Би тедниг таньж меднэв. Тедн Намаг
дахж йовна. 28 Би теднд мөңк жирһл өгнэв. Тедн мөңкиндэн үкшго.
Мини хөөдиг Нанас күн булаж авч чадшго. 29 Нанд Эцкин өгсн
юмн цуг юмнас деер. Тедниг Эцкэс күн булаж чадшго. 30 Эцк Би
хойр ни-негнвидн. 31 Тиигхлэ евреймуд саак кевэрн Исусиг алхар
чолу һартан авцхав. 32 Зуг Исус: — Би тана чирэд Эцкин даалһсн
кесг сэн йовдлмуд күцэвүв. Ямаран йовдлас көлтэ тадн Намаг
чолуһар цокхар седжэхмт? — гиж келв. 33 — Бидн чамаг сэн
йовдлмудас көлтэ цокхар седжэхшвидн. Чамаг Бурхиг му келснэ
телэд, эгл күн Бийэн Бурхнд тоолсн төлэд чолуһар цокхар
седжэнэвидн, — гиж евреймуд хэрүцв. 34 — «Тадн — бурхд» гиж
Бурхн келснь тадна Заканд бичэтэ биший? 35-36 Бурхна Бичгт бээсн
үгмүд мөңкиндэн үнн болдгинь бидн меднэвидн. Бурхна Үг авсн
улсиг бурхд гиж Бурхн нерэдсн биший? Намаг Эцкм шүүж авад
орчлнд илгэв. Би — Бурхна Көвүнв гиж келхлэ, Бурхиг муурулжана
гиһэд яһад тадн Намаг гемшэжэхмбт. 37 Кемр Мини Эцкин даалһсн
йовдлмудыг Намаг эс күцэхлэ, бичэ Нанд итктн! 38 Кемр Мини
Эцкин даалһсн йовдлмудыг Би күцэхлэ, Мини үгд эс итквчн, Мини
кесн йовдлмудт итктн. Тиигэд Би Эцклэ негдэд, Эцк Нанла негдэд
бээдгинь медхит, — гиж Исус келв. 39 Тедн саак кевэрн Исусиг
бэрж авхар седв, зуг Исус теднд бэргдсн уга. 40 Цааранднь Исус
дэкэд Йордан холын телтр эрг тал һарч йовад тенд үлдсмн. Тенд
Йохан урднь эмтиг уснд кирслсмн. 41 Олн күн Исусур ирлэ: —
Йохан өвэрц йовдлмуд эс үзүлв чигн, зуг эн күүнэ тускар келснь

цугнь үнн, — гиж тедн келцхэв. 42 Тенд оln эмтн Исуст итксмн.

Лазарин укл

11:1 Йудья һазрин Бетәнъя хотнд Лазарь гидг күн гемтж. Тер Март Мирьям гидг хойр эгчтэ бээдг бээж. 2 Мирьям каңкнсн үнртэ тосиг Деед Эзн Исусин көлднь түркэд, үсэрн арчдг күүкд күн. Терүнэ дү Лазарь күнд гемтэ бээж. 3 — Деед Эзн, Тана хээртэ үр икэр гемтжэнэ, — гиж эгчнр Исус тал зэнг илгэв. 4 Исус энүг соңсад: — Эн гемэс көлтэ Лазарь үкшго. Бурхиг туурулхин төлэ цут эн учрх. Бурхна Көвүг бас туурулхин төлэ эн гем ирж, — гиж келв. 5 Март, Мирьям болн Лазарь һурвнд Исус ик дурта бээж. 6 Зуг Лазариг гемтэ бээсинь соңсв чигн, Исус бээсн һазртан хойр өдртэн бээв. 7 Энүнэ хөөн Исус эврәннь сурһульчнртан: — Хөрү Йудья һазрур йовхмн, — гиж келв. 8 — Багш, тенд эмтн Таниг чолуһар цокхар седлэ. Тер бийнь Та тиигэрэн йовх санатавт?! — гиж сурһульчнр келв. 9 — Арвн хойр часин кемжэнд өдр герлтэ болна, тиим эсий? Өдрэр йовсн күн бүдршго, тер эн орчлңгин герлиг үзнэ. 10 Ора сөөһөр йовдг күн бүдрх, юңгад гихлэ, тер герл уга, — гиж Исус келв. 11 — Мана үр Лазарь унтж одв, зуг Би терүг серүлхэр йовжанав, — гиж Исус немж келв. 12 — Деед Эзн, кемр тер унтсн болхла, тертн эдгжэх болвза? — гиж сурһульчнр сурв. 13 Исус теднд Лазарь өңгрв гиж келлэ, зуг сурһульчнр Исусиг нөөрин тускар келжэхинь санв. 14 Тиигхлэ Исус: — Лазарь өңгрж одв, — гиж илэр келв. 15 — Терүнлэ хамдан урднь эс бээсндэн Би байрлжанав. Энүн деерэс тадн Нанд иткхит. Эн учрсн юмн таднд туста болх. Лазарь тал йовцхай, — гиж Исус немж келв. 16 Тиигхлэ Томас гидг күн (тер Икрин өрөсн бээсн) наадк сурһульчнрт келв: — Йовцхай! Исусла хамдан үкцхэй!

Исус эгч духойрин зуркинь тогтнулжана

17 Исусиг ирхд Лазарин цогцнь дөрвн өдр үкэрт кевтсн бээж. 18 Бетәнъя Ерусалимас һурвн дууна шаху бээсн. 19 Урднь Март

Мирьям хойрт кесг евреймүд ирэд, теднэ ахиннь тускар һундл төрүлж. 20 Исусиг аашсинь соңсад, Март Терүг тосхар һарв, Мирьям гертэн үлдв. 21 — Деед Эзн минь, Таниг энд бээсн болхла, дүм үкшго билэ. 22 Болв би ода чигн меднэв, Бурхн сурсн юмитн Танд өгх, — гиж Март Исуст келв. 23 — Чини дүүчн эмдрх, — гиж Исус хэрүднь келв. 24 — Би меднэв, тертн сүл өдрт эмдрлһнэ өдрт эмдрх, — гиж Март келв. 25 — Би — эмдрлһн болн жирһл. Нанд иткдг күн үкв чигн эмдрх. 26 Болв эмд деерэн Нанд иткснь төрүц үкшго. Чи Мини келсн үгд иткжәнчи? — гиж Исус сурв. 27 — Э, иткжәнэв, Деед Эзн, Таниг орчлнд ирсн Бурхна Көвүн — Бурхна илгэсн Аврач гисинь иткжәнэв, — гиж Март хэрү өгв.

Исус уульжана

28 Цуг энүг келэд, Март хәрж ирэд, дү күүкән дуудад: — Багш ирв, энд бээнэ. Тер чамаг дууджана, — гиж шимлдж келв. 29 Мирьям үгинь соңсад, босад Исус тал адһж һарад йовв. 30 Исус тер хотн дотр орад уга бээсмн. Тер Мартан тоссн ормд зогсжала. 31 Мирьямин герт ирсн евреймүд терүнд сана зовж төвкнүлжэлэ. Мирьямиг босад йовхлань, терүг үкәр тал уульхар йовжана гиж санад, тедн ардаснь дахв. 32 Мирьям Исусин бээсн һазрт ирэд, Терүг үзэд, көлднь киисэд келв: — Деед Эзн минь! Таниг энд бээсн болхла, дүм үкшго билэ, — гив. 33 Исус оркрж уульжах Мирьямиг болн евреймүдиг үзэд, һашудж гейүрв. 34 — Терүнэ цогцинь тадн альд тэвсмт? — гиж Исус сурв. — Йовхм, Та эврэн үзхит, — гиж тедн келцхэв. 35 Исус уульв. 36 — Энтн үнәр Лазарьт хээртэ бээж, — гиж евреймүд нег-негндән келцхэв. 37 Тер бийнь зәрмнь: — Сохр күүнд хара өгсн күн Лазариг өңгрүлшгоһар юңгад юм эс кесмб? — гиж келцхэв.

Исус Лазариг эмдрулжәнэ

38 Исус гейүрэд үкәр тал йовв. Үкәр гисн хадын көндэ билэ. Хадын амн чолуһар хаалһата бээж. 39 — Эн чолу түлкэд хооран кетн, —

гиж Исус закв. Үксн күүнэ эгчнь Март: — Деед Эзн минь, тендэс үмкэ үнр нарчана, Лазарин цогцнь дөрвн өдр үкэрт кевтнэ, — гив. 40 Тиигхлэ Исус: — Би чамд келлүсв, кемр иткхлэчн, Бурхна туурмж чамд үзгдх, — гиж хэрү өгв. 41 Чолут түлкэд хооран кеснэ хөөн Исус теңгр хэлэһэд келв: — Аав минь, Намаг соңсжасн төлөд Би Чамд ханлт өргжэнэв. 42 Би меднэв, Чи Намаг оньдин соңснач. Би цуг энүг энд зогссн эмтнэ төлө келжэнэв. Чи Намаг илгэввч гиснд эдниг итктхэ гиж келжэнэв. 43 Эн үгмүд келэд Исус чаңар дуудв: — Лазарь, нар нааран! 44 Үксн күн нарв. Терүнэ нар-көлнь еврей эмтнэ заңшалар цаһан кенчрэр, чирэнь альчулар оралһата бээсмн. — Боодһаһинь тээлэд, йовултн, — гиж Исус келв.

Деед хург Исусиг алхар шиидснь

45 Мирьям тал ирсн евреймүдин кесгнь Исусин кесн өвөрц үзэд Терүнд иткв. 46 Зуг зэрмнь паршмуд тал йовад, учрсн йовдлын тускар цээлһж келж өгв. 47 Ах гелңгүд болн паршмуд Деед хург кев: — Эн күн дала өвөрц йовдлмуд кенэ. Ода яахмб? — гиж тедн сурцхав. 48 — Кемр бидн Терүнд зөв өгэд бээхлэ, Тер кех юман цааранднь кех, тер учрар цуһар Терүнд иткх. Тиигхлэнь Римин улс ирэд мана сүмиг болн келн эмтиг уга кеһэд тарах, — гиж тедн келцхэв. 49 Кээп гидг күн тер жилд ах гелң болж йовсмн тер: — Тадн юм меджэхшит. 50 Нег келн-эмтн үкхин ормд нег күн цуг келн эмтнэ төлө үкснь деер болхиг тадн меджэхшийт? — гив. 51 Тер эврэ уханасн эн үгмүд келсн уга, тер цагт ах гелң болсн төлөд тер Исус еврей эмтнэ төлө үкх гисн ээлдхлиг келж өгв. 52 Болв һанцхн еврей эмтнэ төлө биш, цуг оln зүсн нутгт бээсн Бурхна үрдүдин төлө, тедниг цуглуулж негдүлхин төлө Исус эмнэсн хаһцулгдх. 53 Тер өдрэс авн тедн Исусиг алх арһ хээдг болв. 54 Тер учрар Исус еврей эмтнэ заагт ил йовдган уурв. Тер эжго көдөн өөр бээсн Эпрам гидг хотнур йовж одв. Тенд Исус эврэннь сурһульчнртаһан бээв. 55 Йудья эмтнэ Песах гидг нэр өөрдж йовла, эрвслһнэ йос күцэхин төлө, кесг эмтн еврей нутгин һазр болһнас Ерусалим балһснур

ирцхэв. 56 Тедн Исусиг хээлдэд, сүмд ирэд нег-негнэсн: — Эн байр-нээрт Тертн иршго болвза? — гиж сурцхав. 57 — Кедр Исусиг альд бээхинь күн медхлэ, Терүг бэрж авхар дарунь теднд келж өгх зөвтэ, — гисн заквр ах гелнүгүд болн паршмуд харһв.

Мирьям Исусин көлднь канкнсн унртэ тос асхснь

12:1 Песах гидг нэр күртл зурһан өдр үлдж. Исус Бетанья гидг Лазарь бээсн хотнур ирв. Тер хотнд урднь Исус Лазариг эмдрүлсмн. 2 Энд Исусин төлө байрин хот белдв. Март хотынь зөөһэд ширэ деер тэвв. Лазарь талдан гиичнрлэ болн Исусла хамдан ширэ эргж сууж. 3 Мирьям савд [литрин өрөл дүнгэ] кесн нард гидг үнтэ канкнсн үнртэ тосиг авад, Исусин көл деернь асхад, үсэри арчв. Тер канкнсн үнрэр дүүрв. 4 Исусин нег сурһульч Йуда Искериот (хөөннь тер Исусас урвсмн): 5— Эн тосиг һурвн зун цаһан мөңгнд хулдад, меңгинь һуульһнч эмтнд өгх йоста бээсн юмн, — гиж келв. 6 Тер энүг һуульһнч эмтнд санань зовад, теднэ арһинь хээхин төлө келсн биш тер хулхач болад тиигж келв. Йуда меңг хадһлдг хээрцгтэ бээж. Тегэд тер мөңгэн бээж-бээжәһэд эврэн эдлдг бээсмн. 7 — Эн күүкд күүг бичэ гемшәтн. Эн тосиг Намаг оршахар эн хоршаж хадһлтха! 8 Тадна өөр угатя яду эмтн оньдин бээх. Би болхла удл уга таднас салхв, — гиж Исус келв.

Лазарин тускар болсн нууц куундлһн

9 Тер саамд кесг евреймүд Исусиг тенд бээсинь медчкэд ирцхэв. Тедн һанцхн Исусиг хэлэхэр биш дөкэд Лазариг үзхэр ирж. Юнгад гихлэ, тедн Лазариг Исус эмдрүлж гисн зәңг соңсж. 10-11 Евреймүдин ик зунь Лазарас көлтэ ах гелнүгүдиг үлдәһэд, Исус тал ирэд, Терүнә итклд орсн төлөд ах гелнүгүд Лазариг бас алхар седв.

Ик байртаһар Ерусалим балһснур орж ирлһн

12 Маңһдуртнь Песах гидг байрта нээрт ирсн эмтн Исусиг

Ерусалим тал ирж йовхинь сонсв. 13 Тедн шавар зандн модна бүчрмүд авад, Исусиг тосж харв. — Бурхн тууртха! Деед Эзнэ нерн деерэс ирснь эдстэ болтха! Израилин Хан эдстэ болтха! — гиж оln эмтн хээкрцхэв. 14 Исус баахн элжгниг олж авад унад йовж. 15 «Сиона күүкн бичэ э! Хэлэ! Баахн элжгниг унж авсн чини Хан йовж йовна» гиж Бурхна Бичгт бичэтэ бээнэ. 16 Түрүлэд Исусин сурһульчнр яһад тиигжэхинь медсн ута. Зуг Терүг өврмжтэ кевэр эмдрснэ хөөн тедн Исусин тускар Бичгт тиигж бичгдсинь тодлв. Яһад иигж кесинь бас тедн тодлв. 17 Исус Лазариг үкэрэснь дуудж авад, цогцинь яһж эмдрүлсинь үзсн эмтн зогсл ута күн болһнд келдг бээсмн. 18 Ода тедн тиим өвэрц йовдл кесн күн аашсиг медэд, харч Исусиг тосв. 19 — Бидн ю эс кеввчн тус болжахш. Цут нарт делкэ Терүг дахж йовна! — гиж паршмуд уурлад хоорндан келцхэв.

Исус эврәннь уклин тускар келснь

20 Тер байрт ирсн эмтн заагт нег цөөкн грек келн эмтн Бурхнд сөгдхэр ирж. 21 Тедн һалилья һазрин Бетсэд хотна Пилип гидг Исусин сурһульч тал өөрдэд: — Тана зерг, бидн Исусиг үзх саната билэвидн, — гиж сурцхана. 22 Пилип Андрей тал йовад энүнэ тускар келв, тедн хоюрн тер эмтнэ тускар Исуст келв. 23 Исус иигж келв: — Күмни Көвүнэ, Мини туурхин цаг ирв. 24 Би үнэр келжэнэв: Буудян экн һазрт унад эс үкхлэ, негхн болж үлднэ. Кемр буудян экн үкхлэ, оln буудя өгч урһна. 25 Тер учрар эмэн эрвлснь эмэн геех. Эн орчлнд эмэн эрвлдгонь мөңк жирһл эдлх. 26 Нанд церглжэх күн Намаг дахж йовтха! Мини бээсн һазрт зарцм бээнэ. Нанд церглжэх күүнд Эцкм ачинь хэрүлх. 27 Мини седклм икэр зовж бээнэ. Ю келхв ода? Аав минь, Намаг эн цагас гетлүлит! Зуг Би эн цагин төлэ ирсн бээнэв! 28 Аав минь, нерэн туурултн! — Би туурлав, болв дэкн туурхв! — гисн дун генткн теңгрэс соңсгдв. 29 Тенд зогссн оln эмтнэс зэрмнь тер дууг соңсад, эн оһтрһун дун харв гиж келцхэв. Зэрмнь Бурхна элч Терүнлэ күүндв гив. 30 — Эн дун Мини төлэ биш тадна төлэ, — гиж Исус келв. 31 Ода эн орчлңгин

зарһ келһнэ цаг ирв, эн орчлңгин Нойн цааран көөгдх. 32 һазрас деегшән өрггдх цагт цуг әмтнэ оныг Нанд тусх. 33 Эн үгмүдәр Исус ямаран үкләр үкхин тускар цәәлһж келв. 34 Олна заагт бәәсн улс: — Бидн Бурхна Бичгт Христос мөңкинд әмд бәәх гиж умшлавидн. Ода юңгад Та Күмни Көвүн деегшән өрггдх гиж келжәхмт? Күмни Көвүн гиснь кемб? — гиж келцхәв. 35 — Таднла бәәсн герлд бачм цаг үлдв. Харңһу эс болтл, өдрин герлтәд йовтн. Харңһуд йовсн күн альдаран йовсан медхш. 36 Герл герлтжәх кемд герлд итктн. Герлин көвүд болхит! — гиж Исус теднд келәд, һарад цааран йовж одв.

Евреймуд иткжәхш

37 Исусиг кесг өвәрц йовдлмуд үзүлвчн әмтн Терүнд итксн ута. 38 Цут эн Эшья гадг әәлдәчин келснь бүтдгәр учрв: «Деед Эзн! Кен мана келснд итксмб, кенә нүднд Деед Эзнә күч секгдсмб?» 39 Тедн иткж чаддго бәәж, энүнә учринь Эшья гидг әәлдәч: 40 «Нүдәрн бичә үзтхә гийәд, ухаһарн бичә медтхә гийәд, Бурхн теднә нүдинь сохлж, ухаһинь хаав. Тегәд тедн бийән әдгәхәр Нан тал эргж хәләшго гиж Деед Эзн келв», — гиж келв. 41 Эшья Деед Эзнә туурмж үзсн учрар Терүнә тускар иигж келсмн. 42 Тер цагт толһачнр дундас кесгнь Исуст иткв. Зуг паршмуд тедниг хурлас салһх гийәд, эврәннь итклин тускар ил келдго бәәсмн. 43 Әмтнә магтлһн Бурхна магталас теднд деер бәәж.

Исусин уг — зарһч

44 — Нанд иткдг күн Нанд биш Бийим илгәсн Бурхнд иткнә. 45 Намаг үздг күн Бийим илгәсн Бурхиг үзнә. 46 Би — Йосн герлв. Нанд итксн күүг харнһуд үлдәшгоһар Би эн орчлнд ирв. 47-50 Мини үгм соңсад эс күцәдг күүнд Би зарһч бишв. Би эн орчлңгиг гемшәхәр ирсн утав. Эн орчлңгиг харсж аврхар ирв. Намаг һолж Мини келсим эс күцәсн күүнд зарһчнь бәәнә. Үгм сүл өдрт терүнә зарһч болх. Би эврәннь нернәс келсн утав. Бийим илгәсн Эцкм иигж келх заавр өгв. Терүнә заавр — мөңк жирһл гисинь Би үнәртән

меднэв. Мини Эцкимм зааж эгсн үг Би таднд келжэнэв.

Исус сурһульчнриннь көл уһажана

13:1 Песахин байрин өмнө өдр билэ. Эн һазриг үлдөһөд, Эцкүрн хэрү йовх цаг ирсинь Исус медэд бөөлэ. Исус эн һазрт бөөх сурһульчнртан дегд энкр билэ, үктлэн чигн энкр билэ. 2 Сурһульчнр Исусла хамдан асхни хот эдлв. Тер цагт эрлг Шимона Искериотин көвүнд Йудад Багшас урвах уха-сана орулв. 3-5 Бурхн Эцк Исусин һарт бөөсн күчэн өгсинь болн Тер Бурхнас ирэд ода Бурхн тал хэрж йовхинь Исус медв. Исус босад, деерк хувцан тээлж, альчурарн бийэн бүслв. Цааранднь Тер савд ус кеһөд, сурһульчнрин көл уһаһад, бүслсн альчурарн арчв. 6 Шимон Пётр тал Исус еердхлэнь тернь: — Деед Эзн минь! Та мини көл уһахар седжэнт? — гив. 7 — Ода Намаг ю кежэхинь чи меджэхшич, зуг хөөннь медхиц, — гиж Исус хэрү өгв. 8 — Та мини көл төрүц уһашгот! — гиж Пётр келв. — Кедр Би Чини келичнь эс уһахла, чи Нанла хамдан негдшгоч, — гиж Исус хэрүднь келв. 9 — Тиигхлэ, Деед Эзн минь, һанцхн көл биш, һарм, толһаһм бас уһатн, — гиж Пётр келв. 10 — Цевр күүнэ һанцхн көлинь уһах кергтэ, юнгад гихлэ, терүнэ цогцнь цевр. Тадн цевр бөөнэт, зуг цуһар биш, — гиж Исус хэрүднь келв. 11 Терүнэс урвх күүг Исус медлэ, тегэд чигн цуһар цевр бишит гив. 12 Сурһульчнрин көлинь уһаһад, Исус деерк хувцан өмсөд, Эврәннь ормдан ирэд суув. — Тадндан гиж Би ю кесинь медгджэнү? 13 Тадн Намаг Багш, Деед Эзн гинэт. Чик, тертн мөн. Би, Деед Эзн, Багшв. 14 Зуг көлитн уһаж өглэв. Ода тадн тиигж, нег-негднь көл уһах зөвтэт. 15 Тадниг үлгүр автха гихөд, тиигж кетхэ гихөд, уһаж өглэв. 16 Үнэр келжэнэв. Зарц Эзнэс, элч Илгэснэс деер биш. 17 Энүг медэд, цугинь күцэжэх күн буйн-кишгтэ! 18-19 Цуттаннь тускар келжэхшв. Кениг йилһж авсан меднэв. Зуг «Мини өдмг иджэснь өмнэсм һаран өргв» гисн Бурхна Бичгин үгмүд бүттхэ! Энүг учрхин өмн Би ээлдж келжэнэв. Энүг учрсн хөөн БИ БЭӨНЭВ гисндм Тадн дарунь иткхит. 20 Үнэр келжэнэв. Мини илгэсн кү седклдэн

оруддгнь Намаг орулжахнь мөн. Бийим орулдгнь — Бийим Илгэсиг орулх, — гиж Исус келв.

Исусиг бэрж өгх кун

21 Энүг келэд, цааранднь Исус икэр үүмэд: — Тадн дундас негнь Намаг бэрж өгх гиж үнэр келжэнэв, — гив. 22 Сурһульчнр нег-негнүрн хэлэлдэд, кенэ тускар келжэхинь санад өврэд бээцхэв. 23 Исусин хамгин дурта нег сурһульч Терүнэ өөр суув. 24 Шимон Пётр — кенэ тускар келжэхинь сур — гиж терүнд докъялж келв. 25 Тер сурһульч толһаһан Исусур өөрдүлэд: — Деед Эзн минь! Терчн кемб? — гиж сурв. 26 — Мини шүүслж өгсн өдмгиг авсн күн тер болх, — гив. Исус өдмг шүүслэд, Шимона Искериотин көвүнд Йудад өгв. 27 Йуда өдмг авсн цагт терүн дотр эрлг орж одв. — Кех юман шулуһар ке, — гиж Исус терүнд келв. 28 Юнгад Исус терүнд тиигж келжэхинь нег чигн күн медсн уга. 29 Йуда мөңгнэ хоршалһна хээрцгтэ болсн учрас зэрмнь Исусиг терүг байрин өдрт юм хулдж автха, эс гиж мөңгнэ нег хүвинь угатя эмтнд өгтхэ гиж зэрмнь санцхав. 30 Өдмгинь авад, Йуда дарунь гертэс һарв. Харһу сө бээж.

Шин заавр

31-35 йуда һарад йовж одхла Исус: — Ода Күмни Көвүн туурв. Терүгэр дамжад Бурхн туурв. Кемр Бурхн Күмни Көвүһэр дамжад туурсн болхла, Терүг Бурхн Эврэн туурулх, тер дарунь туурулх. Мини хээртэ үрдүд! Таднла бээх цагм чилжэнэ. Намаг санад хээхит. Толһачнрт келсн үгэн таднд ода келжэнэв: Мини йовх һазрур тадн ирж чадшгот. Шин заавр өгчэнэв: Нег-негндэн дурта болтн. Би таднд дурта болсн кевэр нег-негндэн дурта болтн. Кемр тадн тиигж бээхлэ, Мини сурһульч гиж тадниг эмтн медх, — гиж келв.

Исус Пётрин гөрдлһнэ тускар келжэнэ

36 — Деед Эзн Мини, Та альдаран йовжант? — гиж Шимон Пётр Исусас сурв. — Мини йовсн һазрур ода чи йовж чадшгоч, зуг хөөннь Намаг дахад йовхич, — гиж Исус хэрүднь келв. 37 — Деед Эзн минь! Юнгад би Таниг ода дахж эс йовж чаджахмб? Би Тана төлө эмэн өгхд белнв, — гиж Пётр келв. 38 — Чи Мини телө эмэн өгх белнч? Үнэр чамд келжэнэв, эр така эс хээкртл, чи һурв дөкж Нанас гөрдхч, — гиж Исус тиигхлө келв.

Бурхн Эцкур йовх хаалһин тускар

14:1-4 Тадна седкл бичө үүмтхө! Бурхнд итктн, Нанд бас итктн! Эцкимм герт хорас дала. Тадндан бээр белдхэр ода Би йовжанав. Тиим эс бээсн болхла, тиигж келшго билэв. Одад хорас белдснэ хөөн бээсн ормдан тадниг бөөлһхэр Би хэрү нааран ирж тадниг авнав. Альдаран йовх хаалһинь меднөт! 5 — Деед Эзн! Бидн Таниг альдаран йовхитн меджэхшвидн. Йовх хаалһитн ода яһж бидн медхвидн, — гиж Томас Исуст келв. 6-7 Би — хаалһв, Би — үнн болн жирһлв, һанцхн Нанар дамжж Эцкурм күрч чадхит. Кемр тадн Намаг медсн болхла, Мини Эцкиг бас медх билэт. Эн өдрэс авн тадн Терүг медэд үзхит, — гиж Исус келв. 8 — Эцкән маднд үзүлтн, дөкж юмн керго, — гиж Пилип келв. 9 — Эцкән үзүл гиһэд юнгад келжэхмч? Тиим дала цагт Би таднла бөөнэв, тер бийнь чи Намаг меджэхшийч. Намаг үзснь Эцким үзнө. 10 Намаг Эцклө негдж бөөдгинь Эцкиг Нанла негдж бөөдгинь, чи иткжэхшийч? Таднд келсн үгән Эврәннь нернэс келжэхшв. Нанла негдж бөөдг Эцк үүлән күцөжәнэ. 11 Намаг Эцклө негдж бөөдгинь, Эцкиг Нанла негдж бөөдгинь итктн! Тиим биш болхла Мини кесн үүлин телө итктн. 12 Үнэр келжэнэв Намаг Эцк талан йовжах учрас Нанд иткснь Мини кесн үүл күцөһэд, энүнэс икэр күцэх. 13 Мини нерн деерэс юм сурхлань цугинь күцөхв. Көвүһөрн дамжж Эцк туурх. 14 Кемр Мини нерн деерэс тадн сурхлатн, Би сурсиг күцөхв.

Исус Әрун Сәкуснэ тускар келжәнэ

15 — Кемр тадн Нанд дурта болхла, Мини зааврмудыг күцэхит. 16 Би Эцкэсн сурнав. Тер таднд талдан Туслгчиг илгэх. Тер мөнкиндэн таднла үлдх. 17 Тер Туслгч — Бурхна туск үн медүлдг Сэкүсн. Терүг үнн седклэрн орулж авх арһ орчлнд ута. Тер юнгад гихлэ, тедн терүг үзжэхш. Тедн Терүг меджэхш, һанцхн тадн Терүг меднэт. Ода Тер таднта бээнэ. Цааранднь чигн тадна дотр бээх. 18 Тадниг өнчэр үлдэлго, Би хэрү ирхв. 19 Удл уга орчлң Намаг үзшго. Зуг тадн Намаг үзхит. Би эмд бээхв, тер учрар тадн бас эмд бээхит. 20 Тер өдрт тадн Намаг Эцктэ негдж бээдгинь, тадниг Нанта негдж бээдгинь, Намаг таднла негдж бээдгинь медхит. 21 Мини зааврмудыг хадһлдг, күцэдг күн Нанд дурта болна. Нанд дурта болдг күүнд Мини Эцкм дурлна. Би бас терүнд дурлхв. Бийән медүлхв, — гиж Исус хэрүднь келв. 22 — Деед Эзн, юнгад Та орчлнд биш һанцхн маднд бийән медүлхэр бэнт? — гиж Йуда (Искериот биш) келв. 23 — Нанд дурта болдгнь Мини заасар бээх. Эцкм терүнд дурта болх. Терүн тал ирэд, бидн хамдан бээхвидн. 24 Нанд дурго болдгнь Мини үгэр бээшго. Тадна соңчасн үгмүд Мини үгмүд биш, Намаг илгэсн Эцкинм үгмүд. 25-26 Энүг Би таднла бээсн цагт келжәнэв. Туслгчиг, Эрүн Сэкүсиг, Мини нерн деерэс Эцкм илгэх. Тер таднд цугинь зааж өгх. Мини келсн үгиг тадна сананд орулх. 27 Би таднд эв өгчәнэв. Эврәннь эвэн таднд өгчәнэв. Эн орчлңгин кевэр эв өгчэхшв. Бичэ үүмтн, бичэ ээтн! 28 Би таднас салад йовжанав. Зуг Би хэрү ирхв гисн үгмүдм тадн урднь соңслат. Кемр тадн нанд йосндан дурта бээсн болхла, тадн Намаг Эцкүрн йовжана гихэд икэр байрлх билэт. Тер юнгад гихлэ, Эцкм Нанас үлү алдр. 29-30 Би энүг урдаснь келжәнэв. Цугтан эн күцхлэ, тадн Нанд иткхит. Дэкж Би таднд юм келж чадшгов. Эн орчлңгин нойн аашна. Намаг нойлх йосн терүнд уга. 31 Зуг Би Эцкдэн дуртав, Бурхна заасар үүлэн күцэжәнэв. Энүг орчлң медх зөвтэ! Бостн, ода йовий! — гиж Исус келв.

Исус уста узмин иш мөн

15:1-3 Цааранднь Исус иигж келв: — Би — уста үзмин ишв. Уста үзм урһадгнь — Эцкм. Мини деер бээсн темс өгдго бүчриг Тер чавчад хайчкна. Зуг темс өгдг бүчриг урһцта болтха гийһэд цеврлнэ. Тадн болхла ода Мини үгэр цеврлгдвт. 4 Нанла хамдан негдж бээтн. Би таднла бас негдж бээхв. Бүчр ишин энг болсн учрас темс өгч чадна. Зуг бүчр эврэн бийнь темс өгч чадшго. Тиим кевэр тадн Нанла негдж эс бээхлэ, темс өгч чадшгот. 5 Би ишв, тадн бүчрмүд. Нанла негдж бээдг күн болн Би терүнлэ негдж бээхлэ, тер олзта темс өгнэ. Тадн Намаг утаһар юм күцэж чадшгот. 6 Нанла негдж эс бээдг күн уста үзм урһжасн ишэс салһад хайгдсн бүчр мет хумхарж хагсж одна. Тедниг цуглуулж һалд хайж шатана. 7 Кемр тадн Нанла негдж бээһэд үгм күцэхлэ, сурх юман сурхлатн — цутнь таднд өггдх! 8 Кемр тадн дала темс өгхлэ, Мини сурһульчнр болсан үзүлхит. Энүгэр дамжад Эцкм туурх. 9 Эцк Нанд хээртэ бээсн кевэр Би таднд хээртэв. Мини хээрнд багтад бээтн! 10 Тадн зааврмудм күцэхлэ, Мини хээрнд багтхит. Тиигж Би Эцкин зааврмудыг күцәһэд, Эцкиннь хээрнд багтжанав. 11 Эврәннь байрасн таднла хувалцхар, тадниг ик байрта бээтхэ гийһэд энүг таднд келлэв. 12 Мини заавр эн: Би таднд дурлсн кевэр нег-негндэн дурлтн. 13 Үүрмүдин төлэ эмэн өгх дурнас деер дурн уга. 14 Мини заасн үгмүд күцэж бээхлэтн, тадн Мини үүрмүд. 15 Дәкж тадниг зарцнр гиж келжәхшв. Зарц болхла Эзнэ кесиг медхш. Би тадниг Мини үүрмүд гиж нерәджәнэв. Юңгад гихлэ, Эцкәс медж авсан таднд медүлж өглэв. 16 Тадн Намаг шүүж авсн угат. Би тадниг онц шүүж авлав. Орчлнд одад төрүц үрдго темс өгтхэ гиж Би таднд даалһлав. Тиигхлэ Эцкм таднд Мини нерн деерәс сурситн өгх. 17 Мини заавр эн: Нег-негндэн дурта болтн!

Орчлңгин дурго боллн

18 Кемр орчлң таднд дурго болхла, тодлж автн: түрүлэд орчлн Нанд дурго болв. 19 Тадн орчлңгин әмтн бээсн болхла, орчлң тадниг эврә гиж дурта болх билэ. Зуг тадн орчлңгин әмтн бишит, Би тадниг онц

шүүж авад, орчлцгас салхв. Тегэд чигн орчлц таднд дурго. 20 Зарц эзнэс деер биш гисм тадн тодлвт? Кемр Намаг көөсн болхла, тадниг бас көөх. Кемр Мини үгмүд күцэсн болхла, тадна үг бас күцэх. 21 Зуг тадниг Нанд итксн телэд тедн тиигж көөх. Юнгад гихлэ, Намаг Илгэсиг тедн медхш. 22 Кемр Би орчлнд эс ирсн болхла, теднд эс келсн болхла, тедн килнцдэн буру уга болх билэ. Зуг ода тедн бурута, яһад гихлэ, тедн Мини үгм кергтэн авсн уга. 23 Нанд дурго болсинь Мини Эцкдм дурго болна. 24 Кемр Би талдан күн күцэж чаддго кергиг эс күцэсн болхла, тедн буру уга болх билэ. Зуг ода тедн Мини керг-үүл үзв чигн одачн Нанд болн Эцкдм дурго. 25 Зуг теднэ Бичгт бээсн «Учр угаһар Нанд дурго болж» гисн үгмүд бүтдгэр тиигх зөвтэ. 26 Зуг тадн тал Эцкэс һарчах Бурхна туск үнн медүлжэх Сәкүсн, Туслгч, ирхлэ, Би Терүг Эцкэсн тадн тал илгэхв. Тер Мини герч болх. 27 Тадн бийстн бас Мини герчнр. Тер юнгад гихлэ, эклцэс авн тадн Нанла хамдан бөөлэт.

16:1 Тадниг итклэн бичэ хайтха гийэд Би энүг келв. 2 Тадниг хурлас салх. Цагнь ирхлэ, тадниг алжасн эмтн Бурхнд церглжэсэн санх. 3 Эцкм болн Намаг меддго тэлэд тедн тиигж кех. 4 Зуг Би энүг таднд урдаснь саглж келв. Тер цагнь ирхлэ, тодлтн: Би Энүнэ тускар таднд келлэв.

Эрүн Сәкүснэ уулин тускар

Таднла хамдан бээсн учрас түрүлэд Би энүнэ тускар таднд келсн утав. 5 Намаг илгэсн тал ода Би йовжанав. Зуг тадн альдаран йовжанат гиж Нанас суржахшит. 6 Мини келснэс келтэ седклтн зевүрэр дүүрв. 7 Зуг Би үнэр келжәнэв: тадна арһ хээхэр би йовжанав. Намаг эс йовхла, тадн тал Туслгч иршго. Би йовад Терүг таднур илгэхв. 8 Тер ирэд эмтнэ килнцин тускар, Бурхта чик бөөхин тускар, Бурхна зарһин тускар ил цөөлһж секх. 9 Эрүн Сәкүснэ секх килнцнь эн: эмтн Нанд иткхш. 10 Бурхта чик бөөх гиснь эн: Би Эцк талан йовжанав, тадн Намаг дэжж үзшгот. 11 Зарһ гиснь иим: эн

орчлңгин нойн зарһла харһв. 12 Би кесг юм таднд келж чадх билэв. Зуг ода тадн Мини Үг дааж чадшгот. 13 Бурхна туск үниг медүддг Сэкүсн таднур ирхлэ, таднд цуг үниг медүлх. Юңгад гихлэ, Терүнэ келснь Бийэснь һарчах үгмүд биш. Соңссан Тер таднд келх, иргчин тускар бас келх. 14 Тер Намаг туурулх. Юңгад гихлэ, Терүнэ келсн юмн Нанас авад, таднд медүлэд келсн юмн болх. 15 Эцкдм бээсн юмн — Мини. Тер төлэд чигн Би келжәнэв, Тер Нанас авад, таднд медүлх. 16 Удл ута тадн Намаг үзшгот. Зуг невчкн цаг давхла, дэкн үзхит.

Зөвүр болн байр

17-19 Сурһульчһрас зэрмнь нег-негндән: — Удл ута тадн Намаг үзшгот, зуг невчкн цаг давхла тадн дэкэд Намаг үзхит гисн үгмүд юн үгмүд болжахмб? Би Эцкүрн йовжанав гисн юмб? Невчкн цаг гисн үгмүдэр ю келхэр седсмб? Энүнэ келсн үгмүд маднд медгдж өгчэхш, — гиж келцхэв. Исус тедниг ю сурхар седжэхинь медэд: — Тадн нег-негнэсн, удл ута тадн Намаг үзшгот, зуг невчкн цаг давхла, дэкн үзхит гисн үгмүдиг суржант эсий? — 20 Үнэр келжәнэв. Тадн оркрж уульхит. Орчлн болхла байрлх. Тадн зөвүртэ бээхит. Зуг тадна зөвүрин хөөн ик байр ирх. 21 Күүкд улс гиигрх цагтан басл зовна. Яһад гихлэ, гиигрх цаг ирв. Үрэн һарһсна хөөн эн орчлнд шин күн төрв гиж тер байрлад зовсан мартчкна. 22 Тадн бас ода зөвүртэ бээнэт. Зуг дэкэд тадниг үзхлэм, тадна зүркн байрар дүүрх. Тер байр таднас күн булаж авшго. 23 Тер өдр тадн Нанд сурвр өгшгот. Үнэр келжәнэв, Мини нерн деерэс Эцкэс ю сурвчн, Эцк таднд сурситн өгх. 24 Тадн одачн Мини нерн деерэс юм сурад утат. Сурх юман суртн, сурсан авад байрар дүүрхит!

Би эн орчлңгиг диилүв

25 Би энүг таднд үлгүрлж келлэв. Зуг цагнь ирхлэ, Би Эцкиннь тускар үлгүр угаһар ил келхв. 26 Тер өдрт тадн Мини нерн деерэс Эцкэсм юм сурхит. Тадна төлэ гиж Эцкэсн эрж сурнав гиж таднд

келжэхшв. 27 Тадниг Нанд дурлсн төлөд, Намаг Эцкэс ирв гиж итксн төлөд, Эцкм Бийнь таднд дурта. 28 Би эн орчлнд Эцкэсн ирв. Ода дэкед эн орчлңгиг үлдэхэд, Эцк талан йовжанав, — гиж Исус келв. 29 — Ода Та үлгүр утаһар ил келжэнэт. 30 Эмтиг сурврмуд өгтл Та теднэ сурврмудиг урдаснь меднэт. Ода бидн энүг шинкэн медвидн. Тер учрар Таниг Бурхнас ирсинь бидн иткжэнэвидн, — гиж сурһульчнр келцхэв. 31 — Ода тадн Нанд иткжэнт? 32 Соңстн, цагнь өөрдж йовна. Цагнь лавта ирв. Намаг һанцараһим үлдэхэд, тадн тарад гер болһндан йовж одхт. Зуг Би һанцхн бишв, яһад гихлэ, Нанта Эцк бээнэ. 33 Нанла негн болж эв олтха гиж үүг Би таднд келлэв. Эн орчлнд тадниг зовлн күлэжэнэ, зуг бийэн чаһар бэртн. Би эн орчлңгиг диилв! — гиж Исус хэрүднь келв.

Исусин зальврлһн

17:1 Үгэн төгсэхэд, Исус толһаһан өргэд, теңгр хэлэхэд: — Аав минь! Цаг ирв. Көвүн Таниг туурулхин төлө Көвүг туурул. 2 Та цуг күмн эмтиг залх йос Терүнд өгвт. Тер учрар Көвүнтн Тана даалһсн эмтнд мөңк жирһл өгх. Тер зөвиг Та Эврэн Терүнд өгвт. 3 Мөңк жирһл гиснь: Таниг ор һанцхн Бурхиг болн Тана илгэсн Исус Христосиг медж авлһн. 4 Би Таниг эн һазрт туурулв. Тана даалһсн көдлмшиг күцэвүв. 5-6 Ода Аав минь! Орчлң үүдэд тана һарар бүтэгдснэ өмн Би Танла хамдан алдр нернд орсн билэв. Дэкн намаг тер бээдлд орулыт. Нарт делкэхэс авад, Нанд өгсн Тана даалһсн алдр неритн эмтнд секв. Эн эмтн Тана. Та эдниг Нанд өгвт. Эдн Тана үгиг зүркндэн хадһлв. 7 Нанд өггдсн цутинь Танас һарчахинь эдн ода меднэ. 8 Тана келсн үгмүдиг Би цугинь эднд келв. Тедн үгитн седклэрн орулв. Намаг Танас ирснд, Та Намаг илгэв гиснд тедн йосндан иткв. 9 Би эднэ төлө суржанав. Би орчлңгин төлө биш, Тана өгсн эмтнэ төлө суржанав. Тер юңгад гихлэ, эдн Тана. 10 Нанд бээсн юмн Тана. Танд бээсн юмн Мини. Теднэр дамжад Би туурв. 11-12 Би эн орчлңгас һарад Танур йовжанав. Зуг эдн эмтнэ дунд үлджэнэ. Эрүн Аав, эдн маднла эдл ни-негн болтха гихэд, Эврэннь

нернэ күчэр Та эдниг харстн. Та эн нериг Нанд өглэт. Эднлэ бээсн цагт Тана нернэ күчэр Би эдниг харсж йовлав. Та эн нериг Нанд өглэт. Эднэс негнь чигн геедрсн ута. Зуг негнь геедрх зөвтэнь геедрв. Тер юнгад гихлэ, Бичгин үг бүтх зөвтэ билэ. 13 Ода Би Тан тал йовжанав. Зуг назр деер бээсн цагт Мини ик байрар эдн дүүртхэ гиж цугинь Би келжэнэв. 14 Би эднд Тана үг келлэв. Тер учрар орчлң эднд дурго болжана. Юнгад гихлэ, эдн Нанла эдл эн орчлңгин биш. 15 Би эдниг эн орчлңгас автн гиж суржахшв. Та эдниг хар сэкүснэс харстн гиж суржанав. 16 Эдн Нанла эдл эн орчлңгин биш. 17 Үнэр эдниг эрүтктн. Тана Үг йосн үнн. 18 Та Намаг орчлңд илгэсн метэр Би эдниг орчлңд илгэжэнэв. 19 Эдниг Танд нерэдхэр эклэд Бийэн Танд нерэджэнэв. Эдниг үнэр Тана болтха гийэд тийгжэнэв. 20 Би ханцхн эднэ төлэ сурждхшв. Би эднэ үгэр Нанд иткх эмтнэ тускар бас сурж бээнэв. 21 Тедн ни-негн бээтхэ гиж Би зальвржанав. Аав, Та Нанла негдж, Би Танла негдж бээдгэр тедн Мандла негдж бээтхэ. Тедн негдж бээтхэ! Тегэд Та Намаг илгэсиг орчлң иткх. 22 Тана өгсн туурмжиг Би эднд өглэв. Эдн Маднла эдл ни-негн болтха гийэд тийглэв. 23 Тедниг негдүлхэр Би теднлэ негдж бээнэв, Та Нанла негдж бээнэт. Эн учрас Та Намаг илгэвт гиж Нанд дурта болсн кевэр теднд дуран өгнэт гиж орчлң медх. 24 Аав! Тана өгсн эмтн Нанла хамдан бээтхэ. Мини бээсн назрт тедн бас бээтхэ, гиж Танас суржанав. Тедн Мини туурмжиг үзтхэ. Тер туурмжиг Та орчлң үүдэд уга бээтл Нанд ик хээртэ болад өглэт. 25 Үнн чик Аав! Орчлң Таниг медсн уга. Би Таниг меднэв. Болв Та Намаг илгэсиг эдн меднэ. 26 Тийгж Нанд өгсн Тана дурн эдниг дүүргтхэ гийэд болн Намаг теднлэ негдж бээтхэ гийэд, Би эднд Тана тускар секв. Болв цааранднь секэд бээхв.

Исусиг бэрж өглһн болн бэрлһн

18:1 Исус зальврсна хөөн сурһульчнртаһан Кедрон гидг салаг дэврэд, садт ирв. 2 Йуда гидг урвач тер назриг меддг билэ, Исус сурһульчнртаһан оньдин тийгэрэн ирдг бээсмн. 3 Йуда тийгэрэн

Римин цергүдиг, гелңгүдин болн паршмудын илгэсн сүмин харулчнриг дахулсн бас ирв. Тедн шам бэрсн, зер-зевтəһэн ирцхэв. 4 Исус Терүнлэ юн учрхинь медэд бээв. — Кениг хээжэнэт? — гиж Исус өмэрэн һарад теднэс сурв. 5 — Назаретин Исусиг, — гиж тедн хэрү өгв. — Тертн Бив, — гиж Исус келв. Иуда гидг урвач бас теднэ өөр зогсжала. 6 Исус «Бив» гисн цагт тедн цуһар ардагшан цухрад һазр элкдж унцхав. 7 — Кениг хээжэнэт? — гиж Исус давтад теднэс сурв. — Назаретин Исусиг, — гиж тедн хэрү өгцхэв. 8 — Би таднд Тертн — Бив гисн бээнэлм, кемр Би таднд кергтэ болхла, эдниг тэвж йовултн, — гиж Исус келв. 9 «Тана өгсн эмтнэс негинь чигн Би геесн утав», гисн үгмүд тиигэд бүтв. 10 Симона Пётрт үлд бээж. Тер үлдэн өргэд, ах гелңгин зарцин барун чикинь тээрэд хайчкв. Тер зарцин нернь Малх бээж. 11 — Үлдэн дүр! Мини Эцкин белдсн зовлңгиг Би эдлх зөвтэв, тиим эсий? — гиж Исус Пётрт келв.

Исус ах гелңгин өмн

12 Римин цергүд ахлачтаһан болн сүмин харулчнр Исусиг бэрж авв. Тедн Исусиг күлэд, Анас тал авч ирв. 13 Юңгад гихлэ, Ханас Кээпин хадм эцк бээж. Тер жилд Кээп ах гелң болсмн. 14 — Нег күн цут келн эмтнэ төлө үксн деер болх, — гиж урднь Кээп евреймүдин толһачнрт келсн билэ.

Пётрин гөрдлһн

15 Симон Пётр болн дэкэд нег сурһульч Исусин ардас йовсн бээж. Тер сурһульч ах гелңгин сэн таньл бээсн учрас Исусиг дахад, герин хашад орж чадв. 16 Пётр болхла үүднэ ца үлдэд зогсв. Ах гелңгин таньдг сурһульч һарад, үүднэ өөр зогсдг зарц күүкд күүнлэ күүндэд, Пётриг герин хашад орулв. 17 — Та эн күүнэ сурһульчнрин негнь биший? — гиж тер зарц күүкд күн сурв. — Уга, — гиж Пётр хэрү өгв. 18 һаза серүн билэ. Зарцнр болн Римин цергүд һал шатаһад, терүнэ цогин өөр дуладад зогсж. Пётр бас дуладхар тедн дунд зогсв.

Ах гелң Исусиг мөшкнэ

19 Тер цагт ах гелң Исусиг сурһульчнриннь тускар болн номин тускар мөшкв. 20 — Би цуг әмтнд иләр келдг биләв, Би хурлмудт эс гиж сүмд номан умшад, әмтиг сурһдг биләв. Тенд кесг евреймүд цуглрдг билә. Нууц юм Би келдго биләв. 21-22 Юңгад тадн Намаг мөшкәд бәәнәт? Намаг соңссн әмтнәс суртн. Тедн Мини келсн үг меднә, — гиж Исусиг эн үгмүд келснә хөөн, Терүнә еәр зогсжасн сүмин харулчнрин негнь Исусиг халхарнь ташв: — Чи ах гелңглә ямаран кевәр күүнджәхмч! — гихәд тернь келв. 23 — Кемр Би буру үг келсн болхла, буруһинь йилһж кел. Кемр чик келсн болхла, яһад Намаг цоквч? 24 Хана күләтә Исусиг Кәәп гидг ах гелңгүр илгәв.

Пётрин хойрдгч гөрдлһн

25 Симона Пётр һалын өөр дуладж бәәхд, терүг дәкәд нег күн: — Чи Энүнә сурһульчнрин негнь бишвч? — гиж сурла. — Бишв, — гиж тер хәрүцв. 26 Тиигхлә ах гелңгин зарц Пётр чикинь тәәрсн зарцин садн: — Тер садт теднлә хамдан бәәсн чи мөн бишвч? — гив. 27 Пётр саак кевәрн гөрдв, генткн эр така хәәкрв.

Исус Пилатын өмн

28 Евреймүд Исусиг римин закрач Пилатын бәәшнд авч ирцхәв. Песахин байрин өрүнә цаг билә. Евреймүд бийән бузрдашгоһар бәәшң дотрнь орсн уга. Орсн болхла, тедн Песахин байрла асхни хот эдлх зөв уга болх билә. 29 Тегәд чигн Пилат тедн тал һарв. — Юунас кәлтә тадн эн күүг гемшәжәхмбт? — гиж тер сурв. 30 — Эн йос эс әвдсн болхла, бидн Энүг чамур авч иршго биләвидн, — гиж тедн хәрү өгв. 31 Пилат: — Энүг тадн бийстн авад, эврәннь Закаһар зарһинь кетн, — гив. — Мадн кү үкүлхәр цаажлх зөв угавидн, — гиж евреймүд хәрү өгв. 32 Тиим кевәр Исус ямаран үкләр үкх гисн үгмүд бүтәгдх зөвтә бәәсмн. 33 Тиигхлә Пилат бәәшң дотран орад, Исусиг дуудж авад: — Йудья улсин хан чивч? — гиж сурв. 34 — Чи

энүг эврэн келжэнч, али чамд Мини тускар тиигж талдан эмтн келв? — гиж Исус хэрүднь сурв. 35 — Би кемб? Еврей болжахмб? — гиж Пилат хэрү өгв. — Эн чини келн-эмтн, чини ахлачнр чамаг мини харт бэрүлв. Чи ю кесмбч? 36 Исус: — Мини алвт эн орчлңгин биш. Кемр алвтм эн орчлңгин бээсн болхла, Мини алвтнр Намаг евреймүдин толһачнрас харсх билэ. Мини алвт эн орчлңгин биш, — гив. 37 — Чи хан болжахмч? — гиж Пилат сурв. — Чи үнэр келжэнэч. Би — ханв, — гиж Исус келв, — Би төрэд, эн орчлң тал үннэ тускар герчлхэр ирв. Зөвтэ Үнниг медсн күн Намаг соңсна. 38 Пилат: — Үнн гидг юмб? — гиж сурв.

Исусиг уклин цаажла харһулснь

Цааранднь Пилат һазаран һарад евреймүдт келв: — Би эн күүг гемшэх учр үзжэхшв. 39 Танад тиим авъяс бээнэ: Песахин байрт бэрэнд суусн эмтнэс негинь сулдхх кергтэ. Йудья улсин хааг сулдххар седжэнт? 40 Тедн цуһар: — Уга! Энүг биш! Бар-Абаг сулдх! — гиж хээкрв. Бар-Аба болхла деермч күн бээсмн.

19:1 Тиигхлэ Пилат Исусиг маляһар цоктн, гиж цергүдт закв. 2 Цергүд хатхдг көглин ацмудар титм гүрэд, Исусин толһа деернь өмскв. Дэкэд тедн улан лавшг Терүн деер хаяд, 3 даран-даранднь Исус тал өөрдэд: — Йудья улсин хан менд болтха! — гиж хээкрэд, наад бэрэд цокж зоваһад бээв. 4 Пилат дэки эмтнүр һарад: — Хэлэтн! Би Энүг цаажла харһулх буру юм һарһснь нанд медгдхш. Тегэд таднур дэкэд Энүг һарһв, — гив. 5 Исусиг көгл титмтәһинь болн улан лавшгтаһинь һарһад зогсахлань: — Тер күн эн бээнэ, — гиж Пилат келв. 6 Ах гелңгүд болн сүмин харулчнр Исусиг үзэд цуһар: — Кирст хадул! Кирст Энүг хадул! — гихэд хээкрцхэв. — Энүг авад бийстн кирст хадултн. Би болхла Энүнэ кесн буруһинь үзжэхшв, — гиж Пилат хэрүцв. 7 — Мана Закаһар Эн күн үкх зөвтэ. Энтн бийән Бурхна Көвүн гиж нерэднэ! — гиж евреймүд эврәһәрн кехәр келцхэв. 8 Цуг энүг соңссн Пилат улм сүрдв. 9 Тер дэкэд

эврэннь бээшнүгүрн орад: — Чи кенэхнэвч? — гиж Исусас сурв. Зуг Исус тагчг, үг келлго зогсв. 10 — Чи нанла күүндхэр седжэхшийч? Чамаг сулдхх эс гиж кирсд хадулх йосн нанд бээдгинь Чи меджэхшийчи? — гиж Пилат келв. 11 — Кемр чамд эн йос теңгрэс эс өгсн болхла, чи Намаг бэрх йосн ута болх билэч. Тер учрар Намаг чини харт бэрүлсн күүнэ килнц чини килнцэс ик болх, — гиж Исус хэрү өгв. 12 Терүг келснэ хөөн Пилат Исусиг сулдхх арһ хээв. — Кемр чи Эн күүг сулдххла, чи Римин хаана үр биш болхич. Би ханв гисн күн Римин хаана өшэтн болжана! — гиж евреймүд дэки хээкрцхэв. 13 Пилат теднэ үгмүд соңсад, Исусиг харһж авад, эврэн зарһчин ормдан суув. Тер орм чолуһар кесн өндр орм бээж, еврей келэр Габат гиж нерэдгдсмн. 14 Песах гидг байрин өмн басң өдр билэ. Удин цаг бээж. — Хэлэтн, эн тана хан, — гиж Пилат евреймүдт келв. 15 — Энүг цааран йовул, цааран! Кирст хадул Энүг! Кирст! — гиж тедн хээкрцхэв. — Тадна хааг кирст хадулхмб? — гиж Пилат сурв. — Мана Римин хаанас даву хан уга, — гиж ах гелнүгүд хэрү өгцхэв. 16-17 Аш сүүлднь, Пилат Исусиг кирст хадулхар цергүдин харт өгв.

Исусиг кирст хадулснь

Тедн Исусиг авад йовцхав. Эврэннь кирсэн авад, Исус һавлын орм тал йовв. Еврей келэр Голгот гидг һазр бээж. 18 Тенд Исусиг кирст хадулв, Терүнлэ хамдан барун болн зүн талнь дэкэд хойр кү цаажлв. Исус теднэ тал дунднь бээсмн. 19 Пилат харһа модыг беддэд, кирс деер хадултн гиһэд цергүдт закв. Тер харһа моднд: «Назаретин Исус — Йудья улсин хан» гиж бичэтэ бээсмн. 20 Тер бичсн үгмүдиг кесг евреймүд умшсмн, юңгад гихлэ, Исусиг цаажлсн һазр балһсна эөр бээж. Тер үгмүд еврей, Рим болн грек келнд бичэтэ бээж. 21 Ах гелнүгүд Пилатд энтн хажһр гив. — «Йудья улсин хан» гиж бичэ бичтн. «Тер: Би Йудья улсин хан гиж келнэ» гиһэд бичтн, — гиһэд тедн келцхэв. 22 — Бичх юман бичв, — гиж Пилат хэрү өгв. 23 Цергүд Исусиг кирст хадсна хөөн Терүнэ хувцинь авад, дэрвн энгд

хував, күн болһнд күрв. Хитон гидг Исусин хувцнь болхла уйдл уга бүкл билэ. 24 — Энүг хувахмн биш. Жирв хайхм, кенд тусна, тернь авчана, — гиж тедн шиидв. Тиитж Бурхна Бичгт бээсн үгмүд күцв: «Тедн хоорндан зэрм хувцим хувала, болв наадк хувцна төлө жирв хайла». Цергүд тер келсиг күцэв. 25 Исусин кирсин өөр Терүнэ эк, наһц эгч, Клөпән гергн Марий болн Магдален хотна Марий зогсла. 26 Исус эврәннь экән болн хажуднь зогссн дурта сурһульчиг үзв. — Аак, эн чини көвүн, — гиж Исус экдән келв. 27 Эврәннь сурһульчдан Исус: — Эн чини экчнь, — гив. Тер өдрин хөөн сурһульч Исусин экинь герүрн авв.

Исусин укл

28 Исус цуг юмиг күцэгдсинь медлэ, тегэд Бурхна Бичгиг бүклднь күцэхин төлө Тер келв: — Би ундасжанав. 29 Тенд буһшт чаһр бээж. Цергүд терүнд кенчр норһад, моднд өргэд, Исусин урлд күргв. 30 Исус тер чаһриг амсад, келв: — Күцв! Эн үгмүдин хөөн Терүнэ толһань өрч деернь унад, эмнь цогцасн һарв.

Цергн Исусиг хаврһәрнь шаасна тускар

31 Басң өдр билэ, маһдуртнь бемб өдр болх бээж. Бемб өдрлэ кирс деер үксн цогц бээх йосн уга бээж. Дәкәд болхла, бемб өдр — онц Песахин өдр билэ. Тер учрар евреймүдин толһачһр кирс деер хадата әмтнә көлинь хамхлад, цогцснь кирс деерәс буулһх зөв Пилатас сурв. 32 Цергүд ирәд, нег хадата күүнә көлинь хамхлад, наадк күүнә көлинь хамхлв. 33 Тедн Исусур өөрдлә, Исус әмн уга бээж, тер учрар тедн Терүнә көлинь хамхлсн уга. 34 Зуг нег цергч жидәр Исусиг хәврһәрнь шаав, цусн усн хойр Исусин цогцас асхрв. 35 Цуг энүг үзсн күн тадниг итктхә гийһәд, энүнә тускар герчлжәнә. Терүнә герчллһн үнн, болв тер үн келжәсән меднә. 36 Бурхна Бичгин «Терүнә нег чигн ясн хуһршго» гисн үгмүд күцхин төлө цуг эн йовдл учрв. 37 Бичгт дәкәд нег халхд бичәтә билә: «Тедн шаагдсн күүнүр хәләх».

Исусиг оршалһн

38 Хөөннь Ариматьяс ирсн Йосип Исусин цогциг Пилатас сурв. Йосип Исусин нууц сурһульч бээсмн. Юңгад гихлэ, тер евреймүдин толһачнрас ээдг бээж. Пилат зөв өгхлэ, тер ирэд, Исусин цогциг авв. 39 Йосипла хамдан Никодим ирв. Тер Никодим Исусур сөөд ирдг билэ. Никодим һучн килограмм канкнсн смирн болн алоэ гидг сээхн үнртэ тос авч ирв. 40 Тедн Исусин цогциг кирсэс сулдхад, цогциднь сээхн үнртэ тос түркэд, кенчрэр орав, еврей эмтнэ йосар цогциг тиигж оршадг бээж. 41 Исусиг цаажлсн ормд сад бээж, тер сад заагт шин кесн хадын кендэ бээсмн. Тер кэндэд күн оршагдад ута бээж. 42 Тегэд Песах байрин эдрмүд өөрдж йовсн цаг билэ. Тер хадын кэндэ өөрхн бээсн учрас Исусиг тенд оршав.

Исусин эмдрлһн

20:1 Өр цээтл шин долан хонгин түрүңк өдр эклхин эмн Магдален хотна Марий харһуһар үкэр тал йовна. Өөрдэд ирхлэнь, үкэр хаасн хад чолун тедүкнд кевтсинь үзв. Үкэрнь секэтэ бээж. 2 Тер Симона Пётрүр болн Исусин дурта сурһульч тал гүүж ирэд: — Тедн Деед Эзиг үкэрэснь һарһад авад йовж оч, цогцинь альд орксинь бидн меджэхшвидн! — гиж келв. 3 Пётр тер сурһульчта хамдан тер дарунь үкэрүр йовцхав. 4 Тедн хоюрн гүүж. Зуг тер сурһульч Пётриг күцэд үкэрүр түрүлэд гүүж ирв. 5 Үкэр дотр шаһаж хэләһэд, тенд Исусиг орасн оршалһна кенчр үзв. Зуг сурһульч үкэр дотр орсн ута. 6 Дәкэд терүнә ард йовсн Симон Пётр гүүж ирэд, үкэр дотр орв. Исусин цогциг орасн кенчр 7 болн толһаһинь боосн альчур бас үзв. Тер альчур наадк кенчрмүдэс талдан ормд эвкэд тэвгдсн бээж. 8 Тиигхлэ түрүлэд үкэрүр гүүж ирсн наадк сурһульч бас үкэр дотр орв. Тер үзэд иткв. 9 Бурхна Бичгэр Исусиг эмдрхинь тедн ода чигн медэд ута бээж. 10 Сурһульчнр герүрн хэрв.

Магдален хотна Марий Исус хойр

11-12 Марий үкэрин өөр ууляд зогсв. Уульн бээж тер үкэр дотр шаһаж хэлэв. Генткн цаһан хувцта хойр Бурхна элчнриг тер үзв. Тедн Исусин цогц кевтсн ормд сууж, негнь толһаднь, дарукнь келднь. 13 Бурхна элчнр Марийас: — Күүкн, чи юңгад уульжахмч? — гиж сурв. — Тедн мини Деед Эзиг авад йовж одв. Болв Терүг альд тэвсинь би меджэхшв, — гиж тер хэрү өгв. 14 Күүкд күн хэрү эргэд хэлэв, генткн тенд Исусиг үзв. Зуг Исусиг Бийнь зогсжахинь тер йосндан таньж медж чадсн ута. 15 — Күүкн, юңгад уульжахмч, кениг хээжэхмч? — гиж Исус келв. Марий Исусиг сад хэлэдг күн гиж санад келв: — Эзн минь, кемр Чи Исусиг авад йовж одсн болхла, цогцинь альд тэвсэн кел, би йовад авнав. 16 — Мирьям, — гиж Исус терүнд келв. Күүкд күн Терүнүр эргж хэләһэд, еврей келәр: — Раввуни! (Багш гидг үг), — гиж хээкрв. 17 — Дәкж Нанур һаран бичә күрг! Би Эцкүрн деегшән һарад угав. Мини дүүнр тал йовад кел: Би эврәннь Эцкүр болн тадна Эцкүр хәржәнэв, Мини Бурхн тал, тадна Бурхн тал, — гиж Исус келв. 18 Магдален хотна Мирьям сурһульчнр тал йовад: — Би Деед Эзиг үзв! — гиж келв. Исусин келсн үгмүдиг теднд тер келж өгв.

Сурһульчнр эмдрсн Исусла харһжана

19 Асхн долан хонгин түрүнк өдртнь сурһульчнр цуглрсмн. Тедн евреймүдин толһачнрас эәһэд, үүдән төдглж. Үүднь төдгтә бээсн бийнь Исус ирэд: — Бурхн тадниг өршәтхә! — гиж келәд, 20 Сурһульчнртан эврәннь хойр һаран, хәврһән үзүлв. Тедн цуһар Деед Эзиг үзәд, икәр байрлцхав. 21 — Бурхн тадниг өршәтхә! Эцкм Намаг илгәсн кевәр Би тадниг илгәжәнэв, — гиж Исус келәд, 22 тедн тал үләһэд, келв: — Эрүн Сәкүсиг автн, — гив. 23 — Кемр тадн күүнә килнц тәвж өгхлә, Бурхн терүнә килнц тәвж өгх. Болв кемр тадн күүнә килнцинь эс тәвж өгхлә, Бурхн терүнә килнц тәвж өгшго, — гиж Исус келв.

Исус Томас хойр

24 Исусиг ирсн цагт Икрин өрөсн Томас, арвн хойр сурһульчнрин негнь уга бээж. 25 — Бидн Деед Эзиг үзлөвидн! — гиж талдан сурһульчнр терүнд келв. — Хадасн орсн ормиг һартнь үзэд эс көндөтл болв хэврһднь бээсн шавинь эс көндөтл би төрүц иткшгов, — гиж Томас хэрү өгв. 26 Долан хонг давсна хөөн сурһульчнр саак кевэрн нег герт цуглрв. Тер цагт Томас бас теднлэ бээв. Үүдн төдгтэ бээлэ, зуг Исус дэкн үзгдэд, сурһульчнрин дунд зогсад: — Бурхн тадниг өршөтхэ! — гиж келв. 27 — Эврәннь хурһан өг нааран, Мини һар хэлэ. һаран өгэд Мини хэврһм көндө. Маһдл уга итк! — гиж Исус Томаст келв. 28 Томас: — Деед Эзн минь болн мини Бурхн! — гиж хэрү өгв. 29 Исус: — Чи Намаг үзэд итквч. Намаг үзлго иткдг күн буйн-кишгтэ! — гив.

Эн дегтрин тускар

30 Кесг өвөрц темдг Исус сурһульчнртан үзүлв. Теднэ тускар эн дегтрт бичгдсн уга. 31 Исус Бурхна илгэсн Аврач Бурхна Көвүн гиж иткүлхин төлө, болв иткэд Терүнэ нернэ төлөд мөңк жирһл эдлж бээтхэ гиж эн депр бичгдсн бээж.

Исус долан сурһульчнрт узулснь

21:1 Хөөннь Исус Тиберэд нуурин өөр сурһульчнрт үзгдв. Эн иигж учрв. 2 Шимона Пётр, Икрин өрөсн Томас, һалилья Каньн Натаналь, Зебедаин кевүн болн дэкэд хойр сурһульч хамдан цуглрж. 3 Шимона Пётр: — Би заһс бэрхэр йовнав, — гив. — Бидн бас чамта хамдан йовнавидн, — гиж тедн келцхэв. Тедн нур тал ирэд онһц дотр орцхав. Зуг тер сөөд юм бэрж авсн уга. 4 Өр цээхлэ, Исус тедниг усна көвөд күлэж, зуг сурһульчнр Исусиг таньсн уга. 5 — Үүрмүд Мини, заһсн бээнү? — гиж Исус тедниг дуудж сурв. — Уга, — гиж сурһульчнр хэрү өгв. 6 — Оңһцин барун талан гөлм хайтн, заһс бэрж авхит, — гиж Исус келв. Тедн гелмән хаяд ик дала заһс бэрэд, эрэ гиж терүг һарһж авв. 7 Исусин хамгин хээртэ сурһульч Пётрт: — Энтн Деед Эзн! — гиж келв. Шимон Пётр Деед

Эзн гисинь соңсад, деерк хувцан бий деерэн хаяд, (тер юнгад гихлэ, белкүсцәһән нүцкн бәәж) оңһцас уснд орв. 8 Наадк сурһульчнр оңһц дотр бәәһэд, заһсар дүүрн гөлм татн бәәж Пётрин ардас дахж йовв, усна көвә күртл зу метр шаху үлдсн билә. 9 Тедн оңһцан тәвэд, эрг деер һархла, шачасн дендр үзв. Терүнә цог деернь шаргджах заһсн, өөрнь болһсн өдмг бәәж. 10 — Бәрж авсн заһснас тадн невчкниг нааран авч иртн, — гиж Исус теднд келв. 11 Шимона Пётр оңһц дотр орад, гөлмиг уснас татж авад һазрт хайв. Тедн зун тәвн һурвн ик заһс бәрж авч. Тиим дала заһс дааһад, гөлм тасрсн уга бәәж. 12 — Наартн, хотан уутн, — гиж Исус сурһульчнрт келв. Сурһульчнрас нег чигн күн кембт? гиж зөрглж сурсн уга. Терүг Деед Эзн гиж тедн медв. 13 Исус өөрдәд өдмг заһс хойриг теднд өгв. 14 Әмдрснә хөөн Исус сурһульчнрт һурвдад үзгдсмн.

Исус Пётр хойр

15 Хотын хеэн Исус: — Йохана көвүн Шимон, чи эднәс үлү Нанд дурта бәәснь үнәрий? — гиж Шимон Пётрт келв. — Тиим, Деед Эзн. Би Танд яһж дурта болдгинь Та эврән меднәт, — гиж тер хәрү өгв. — Тиигхлэ Мини хурһдыг хәрүл, — гиж Исус келв. 16 — Йохана көвүн Шимон, чи Нанд дуртавч, угай? — гиж Исус Пётрәс хойрдад сурв. — Тиим Деед Эзн. Яһж би Танд дурта болдгинь Та эврән меднәт, — гиж Пётр келв. — Мини хөөдиг хәлә, — гиж Исус хәрү өгв. 17 — Йохана көвүн Шимон, чи Нанд дуртавчи? — гиж Исус Пётрәс һурвдад сурв. Исусиг һурвдад суржаснд Пётр гейүрәд: — Деед Эзн, Та цугинь меднәт, Намаг Танд икәр дуртаһинь бас меднәт, — гив. — Мини хөөдиг хәрүл, — гиж Исус терүнд келв. 18 — Үнәр чамд келжәнәв, баһ цагтан чи эврән бийән нег мөсләд, дурта һазрт йовдг арһта биләч. Зуг чамаг көгшрхлә, һаричнь бооһад талдан күн чамаг дурго һазрт авад йовх. 19 Эн үгәр Исус Пётриг ямаран үкләр үкхинь келсн бәәж. Тер үкләр Пётр Бурхиг туурулх. Цааранднь Исус Пётрт: — Намаг даһад йов, — гив.

Исус болн Терунэ дурта сурһульч

20 Пётр ардагшан хэлэхэд, Исусин дурта сурһульчиг үзв. Тер сурһульч асхни хот уусн цагт Исуст толһаһан өөрдүлэд: «Деед Эзн, кен Чамас урвх?» — гиж сурла. 21 Терүг үзэд, Пётр: — Деед Эзн, энүлэ юн учрх? — гиж сурв. 22 — Кемр Намаг хэрү иртл энүг эмд бөөлххэр седхлэ, чамд юн кергв? Чи Намаг дахад йов, — гиж Исус хэрүднь келв. 23 Эн үгмүдин хөөн сурһульчнр заагт тер сурһульч үкшго гисн зэнг тарв. Зуг Исус үкшго гиж келсн үга: — Кемр Намаг хэрү иртл, энүг эмд бөөлххэр седхлэ, чамд юн кергв? — гиж келсмн. 24 Цуг Энүг герчлжэсн, цуг энүг бичснь Исусин келжэсн сурһульч. Бидн цуһар меднэвидн, эн герчллһн үнн.

Сул угмуд

25 Исус олн юм күцэв. Кемр цугинь бичж авхла, Терүнэ тускар бичгдсн дегтрмүд цут нарт делкэд багтлго чигн бөөх билэ.